

華嚴疏鈔

秋

C40  
4514  
240



40-4541

丁亥夏月請大成殿及有  
家書置之州學藝山  
我微笑塔院頂廟中永  
為學者不敢許出院內

東漢書

大方廣佛華嚴經疏鈔卷十三之二

于闐國三藏沙門實叉難陀

清涼山大華嚴寺沙門澄觀撰述

**菩薩問明品第十**

疏釋此品亦有四門。初來意中。有通有別。通謂上來三品已答十句。生解所依。此下正答生解因果。故次來也。生解因中先答十住。住攬信成。將答所成先辨能成。又正答十信。故下三品來也。後別者三品明信。有解行德解爲二本。此品先來。鈔通謂下。明盡一分來意。直盡第七會來。生解因中

下。惟明下三品來意。初依古德信任合明。又正答下疏意別明答信。以第二會初十問中脫十信問故。今三品答之。不答住也。然賢首意始教別開信位。如梁論云。如湏陀洹見道前四位。謂燭頂忍世第一。菩薩道前四位亦爾。謂十信十住十行十迴向。又彼論及佛性論皆云。地前修四種行。謂十信修信。樂大乘行。十解修般若行。十行修三昧行。十迴向修大悲行。如其次第。即是四位故。又爲除四類障正使故。卽此四位。謂初除闡提不信障。二除外道我執障。三除聲聞畏苦障。四除獨覺捨大悲。

障。又信成淨德因種解成我德因種行成樂德因種。廻向成常德因種。又仁王經寄四輪王謂鐵銅銀金。以上教義故知十信亦成位也。若終教十信。但是十住方便。自無別位。謂仁王釋三賢云。十信十止十堅心。十信卽住故。今疏不論成位不成位。皆以三品別答信問。別一會答。含有問故。已如前。

疏二釋名者。菩薩是人問明是法。遮果表因。故云菩薩問卽是難。明卽是答。然問有二種。一汎爾相問。梵云必理車。二者難問。謂以理徵詰。梵云鉢羅

1 2 3 4 5 6 7 8 9 10 1 2 3 4 5 6 7 8 9 10

室囊卽今品意也。答亦有二。一但依問訓。答報曰。答二若俱爲解釋。旁兼異義。美言讚述。令理顯煥。曰明。卽今品意也。明亦破闇。能除問者之疑闇。故今文殊九首。互爲明難。遞作堪椎。研覈教理。以悟羣生。故以名也。又長行明起於問。偈頌明解於問。故曰問明。不云答者。欲以明兼於問故。問有二義。故得稱明。一問中徵責詰難理盡。使答者亡言。此至明之間也。二以問中進退詰理令現。使答者另釋。故以爲明。又明卽法明。以十菩薩問出十種法明。故曰問明。雖諸義不同。皆菩薩之間明。依王釋明。故曰問明。雖諸義不同。皆菩薩之間明。依王釋

也。鈔然問有一下。約論通問。卽是難明。卽是答。今對彼難問。故答稱明。此明局在答者。而有二義。一顯理爲明。此明屬自明。亦已下。二破闇爲明。此約答他。令他明故。又長行下。二約賓王問。唯屬問明。通問答使答者亡言者。如緣起甚深中問云。心性是一。何以種種。若云緣令種種。何以復不相知。逆遮其救。使其亡言。使答者易釋者。謂問意言。旣是一性。何以種種。欲言種種。復不相知。故答云。由不相知。能成種種。種種無性。卽不相知。故不乖一性。卽答者易釋也。又明卽法下。三約理法釋。亦是

1234567890

1234567890

約教義說。謂問卽是教釋。有往復。故明卽法明。是義所攝。謂十甚深爲十種法明。就此法明。又約心境法。卽是境明。卽是心。以智慧明照二諦法。故云法明。

疏三宗趣者。亦先通後別。通復二義。一通分宗。二通會宗。並如會初。二別明此品。有其二義。一望當品。以十甚深爲宗。依成觀解爲趣。二望後二品。則以甚深觀解爲宗。成後行德爲趣。

疏四釋文。此下至菩薩住處。明生解之因。配十句問。如前問中。依文次第。且分爲六。初此下三品。明

未信令信。一第三會已信令解。二第四會已解令行。四第五會已行令起願。五第六會已起願令證入六十定品。至住處品已證入令等佛。今初三品卽爲三別。此品明正解理觀。次品明隨緣願行。賢首品明德用該收。就初分二。先問答顯理。後示相結通。前中以十菩薩各主一門。顯十甚深。卽爲十段。一緣起甚深。二教化甚深。三業果甚深。四說法甚深。五福田甚深。六正教甚深。七正行甚深。八正助甚深。九一道甚深。十佛境甚深。此十甚深。次第云何。緣起深理。總該諸法。觀解之要。故首明之。

1 2 3 4 5 6 7 8 9 10 1 2 3 4 5 6 7 8 9 10

衆生迷此故湏教化違化順化。有善惡業。欲知此業。由說法成然說法成善。唯佛福田。既說順田。湏持聖教。教在勤行。行湏助道。助必有正。殊途同歸。得一道者當趣佛境。故爲此次。又此十種亦可配於十信。但不次耳。文殊佛境。卽當信心。文殊主信。故佛境卽所信。故約發心次第。信居其初。約所信終極。最居其後。亦明十心不必次故。勤首卽進心財首爲念。心明四念故。德首定心。心性無念爲上定。故智首卽慧。心慧爲上首。兼已莊嚴。故有十度法首。卽不退心。如說修行不得退故。寶首卽戒心。

三聚無缺。如寶珠故。業果甚深。戒所招故。覺首卽護法心。緣起甚深。是所護故。目首卽願心。福田等一。由願異故。目能將身。如願導行故。賢首卽回向心。以歸一道。卽迴向真如。一身一智等。卽是佛果。文云如本趣菩提。所有迴向心等。以是圓融十法。故各兼多義。又亦攝十信之十德。恐繁不敍。鈔前中以十菩薩下。先列十名。然十甚深。卽遷禪師所立。今古同遵。緣起深理者。若染若淨。染淨交徹。無不攝故。攝論云。菩薩初學。應先觀諸法。如實因緣。以成正信。及正解故。又此十種下。先正配釋。然

十信心。謂一信。一進。三念。四定。五慧。六不退。七戒。八護法。九願。十廻向。配文可知。以是圓融下。後通妨難。謂有難云。信進等相。釋處易知。今十甚深。文義兼廣。何得而是十信等耶。故爲此答。又亦攝者。信有十德。一親近善友。二供養諸佛。三修習善根。四志求勝法。五心常柔和。六遭苦能忍。七慈悲深厚。八深心平等。九愛樂大乘。十求佛智慧。配十甚深者。一卽正教甚深。近佛善友聞教法故。二卽福田甚深。三卽業果。四卽緣起。五卽正行。六卽財道。七卽教化。八卽一道。九卽說法。十卽佛境。通說佛。

智爲所信故。既有多含。故文義兼廣。  
爾時文殊師利菩薩問覺首菩薩言

疏且爲十甚深解。然有二義。一約行。二約法。言約行者。文殊發問。九菩薩答。明妙慧通於衆行。九菩薩問。文殊爲答。明衆行成於妙慧。言約法者。初九顯差別義。後一顯差別同歸佛境。此二不二。成信中之觀解。鈔妙慧通於衆行者。文殊爲妙慧。九首爲衆行。各主一門故。而問爲能成。答爲所成。故妙慧衆行互爲能所。此二不二者。融上二也。謂行與法不二。了法成行。行契法故。又衍法師云。一人

問多表一中解無量故。多人問一表無量中解一  
故。又文殊是王。餘九是伴故。文殊是總。餘九是別。  
不是全要。故略不出。

疏文中十段。皆先問後答。又先起明問。後解問明。  
今初緣起中二。初問分二。初爾時下。彰問答之王。  
問覺首者。彼得此門故。緣起深義不覺則流轉故。  
二正顯問端略起五門。初問所爲者。有一義故。最  
初問之一拂異見。二顯深理。拂見有三。一令諸菩  
薩知法從緣異外道見。二知從心現捨。二乘見。二  
但心性起不同權教。二顯深理者。令諸菩薩於此。

實義發深信解。起行證真。始終皆實。故問斯義。起  
信論云。有法能起摩訶衍信根。是故應說。所言法  
者。謂衆生心。依一心法。有真如門。及生滅門。彼論  
依此生淨信故。鈔二顯深理者。疏文分二。先正  
明。令始涉者便悟心性。超乎大方。故云。始終皆實。  
起信論云。下第二引證。於中有四。初至應說。是論  
初標文。二所言法者。謂衆生心。卽立義分。論云。次  
說立義分。摩訶衍者。總說有二種。一者法。二者義。  
初標文。二所言法者。謂衆生心。卽立義分。論云。次  
說立義分。摩訶衍義。何以故。是心真如相。  
所言法者。謂衆生心。是心卽攝一切世間出世間  
法。依於此心。顯示摩訶衍義。何以故。是心真如相。

即是摩訶衍體故是心生滅因緣相能示摩訶衍自體相用故釋曰法通軌持亦能顯下義故稱爲法該於染淨大位在因故言謂衆生心爲染淨依故攝世出世何以故下出攝所以以有三天故三大卽義大位在果今取通爲緣起之本故但引法以證真心隨緣三從依一心法有真如門及生滅門卽義引解釋分顯示正義中文以釋前法論云顯示正義者依一心法有二種門一者心真如門二者心生滅門是二種門皆各總攝一切法盡是義云何以是二門不相離故心真如門者卽是一

法界大總相法門體所謂心性不生不滅等次下釋心生滅云心生滅者依如來藏有生滅心所謂不生不滅與生滅和合非一非異名阿賴耶識等廣如彼釋今以真如證心性一隨緣生滅而成種種爲此深理故四從彼論依此生淨信故卽結示爲實馬鳴依此造論令物生信何不信耶

疏二述問意者謂明心性是一云何見有報類種種若性隨事異則失真諦若事隨性一則壞俗諦設彼救言報類差別自由業等熏識變現不關心性故無相違者爲遮此救故重難云業不知心等

123456789

10

11

123456789

謂心業互依。各無自性。自性尚無。何能相知而生諸法。既離真性。各無自立。明此皆依心性而起。心性既一。事應不多。事法既多。性應非一。此是本末相違難。亦是理事相違。亦一異相違。亦真妄相違。鈔各無自立者。起信論云。若得無念者。則知心相生住異滅。以無念等故。而實無有始覺之異。以四相俱時而有。皆無自立。本來平等。同一覺故。心性既一下。二正結。先以本難末。事法既多下。後以末難本。故初結云。本本相違。此結有四。一本末。約能所生。二事理。直語體性。二一異。唯語其相。然一本

有事一。有理一。今是理一。四真妄。唯語其體。然真亦通事。如佛真智等。今亦約理爲真。以含義不同。故有四結。大同小異。

疏三揀定所問者。準此問意。離如來藏。不許八識能所熏等。別有自體能生諸法。唯如來藏。是所依生。亦不可言八識無二類。故名心性一。以能生種種。非相違故。亦非第八而爲性。一熏成種種。非相違故。心性之言。非第八故。答中既言法性本無生。示現而有生。法性卽是真。如異名。正與報事相違。故成難耳。文殊欲顯實教之理。故以心性而爲難。

撰述

華嚴疏錄卷之二

大

私

本欲令覺首以法性示生。決定而答。海會同證。楞伽密嚴皆廣說故。鈔三揀定所問者意云。此是假名法相。師問欲顯法性義。非是法性師問。顯成法相義。故云揀定亦不可言下。二遮救也。卽法相師救云。此法性師難法相義。心性是一者。八識心王同是心故。名爲性一。破云。生於種種卽眼耳鼻舌等。故非相違。亦非第八下遮轉救云。若八識非一。第八賴耶。此是一義。故今破云。第八正是所熏心體。含多種子。熏成種種。亦非相違。心性之言下。以理正折。第八但是心相生滅。非唯識性答中既

云法性示生。不言第八無生示生。明是真如隨緣義耳。

疏四會相違者。問若爾。瑜伽等中異熟賴耶。從業惑種辦體而生。非如來藏隨緣所成。如何會釋答瑜伽等中。對於凡小。約就權教。隨相假說。楞伽密嚴對大菩薩。依於實教。盡理而說。旣機有大小。法有淺深。教有權實。故不相違。故密嚴云。佛說如來藏。以爲阿賴耶。惡慧不能知。藏卽賴耶識。此明守權拒實。訶爲惡慧。又彼經云。如來清淨藏。世間阿賴耶。如金與指環。展轉無差別。楞伽中真識現識。

如泥團與微塵。非異。非不異。金莊嚴具。亦復如是。皆此義也。又彼經云。如來藏爲無始惡習所熏。名爲藏識。又入楞伽云。如來藏名阿賴耶識。而與無明七識共俱。又起信論云。不生不滅與生滅和合。非一非異。名阿賴耶識。又如達磨經頌云。無始時來界。爲諸法等依。攝論等就初教釋云。界者因義。卽種子識。實性論翻此頌云。此性無始時等。彼論就實教釋云。性者。謂如來藏性。如聖者勝鬘經說。依如來藏故有生死。依如來藏故有涅槃。以此等文。故知兩宗不同。淺深可見。又唯識等亦說真如。

是識實性。但後釋者定言不變。失於隨緣過歸後輩耳。鈔四會相違者。此門躡前而起。謂若依上如來藏隨緣成立。則違瑜伽等文。故會之先敍所違。玄談已釋。後答下會通。先相宗意。後楞伽下申性宗意。故密嚴下引證。初引密嚴。自有二文。俱是第三卷微密品。兩頌相續。中間有釋。故着又言。此前更有一偈云。如來清淨藏。亦名無垢智。常住無始終。離四句言說。次卽云。佛說如來藏等。彼疏釋云。上半定賴耶體。謂是如來藏與妄染合。名賴耶。更無別體。此實教說。故引佛說。下半明會權教謂。

守權者不能了如來藏作賴耶者當知惡慧之言。訶守權者令歸實說次頌卽如來清淨藏等彼疏釋云此頌釋成前義上半法說牒舉下約喻釋成謂如金作指環環相虛無金體露現故云無差別如來藏作賴耶賴耶相虛藏性理現亦可迷成賴耶悟成如來藏體無有二故云無差楞伽中真識現識如泥團等者若具彼文亦爾下云大慧若泥團微塵異者非彼所成而實彼成是故不異若不異者泥團微塵應無差別如是轉識藏識真相若異者藏識非因若不異者轉識滅藏識應滅而自

真相實不可滅是故非自真相滅賢首解云此中真相是如來藏轉識是七識藏識是賴耶此解甚當但喻有二而合有三意少難見此卽第一經初先明識三相次明三識初云諸識有三種相謂轉相業相真相釋曰此三種相通於八識謂起心名轉八俱起故皆有生滅故名轉相動則是業如三細初業相八識皆動盡名業相八之真性盡名真相經云諸識有三種相則知三相通八識次經辨三識云大慧畧說有三種識廣說有八種相何等爲三謂真識現識分別事識釋曰約不與妄合如

來藏心爲真現卽第八下經云譬如明鏡現衆色像現識處現亦復如是明是第八餘七皆名分別事識是則三識別爲三類現唯第八分別唯前七真相約佛是八出纏約凡在第八中亦兼餘七然泥團經文含前二段意明三識而參三相之名轉識卽轉相之名意是分別事識故唯識中名七轉識藏識卽現識此則可知真相卽真識上二取識類別故牒識名真相但取通八之真故牒相名經文言若異者藏識非因者謂三若異藏識則應不同真相及轉識爲因旣以轉識熏故真識隨緣而

成藏識則知不異非以藏識爲二識因故下重按定云非自真相滅但業相滅斯則三事備矣謂喻中有三一塵二水三泥以水和塵泥團方立以業熏真相藏識便生業以合水但水滅而塵在故業亡而真存若自真相滅者藏識卽滅者反顯藏識以真妄和合而成但其妄滅而真體不無故下以水喻如來藏波喻七識合成動海卽爲藏識但波相滅濕性不壞卽斯義也不異之義易知言皆此義者皆是如來藏隨緣成識義也然云自真相者十卷但云自相曉公釋云本覺之心不藉妄緣性

自神解。名自真相。約不一義說。又隨無明風作生滅時。神解之性與本不異。亦各自真相。是依不異義說。又彼經云等者。上辨與七和合爲藏識。今明無始無明爲因。故論下文中。無明爲因。生三細。境界爲緣。生六龐。此中正取無明爲因。生於三細。三細旣屬賴耶。已成識藏。卽第四經文。具云大慧。如來藏是善不善因。能徧興造一切趣生。譬如伎兒變現諸趣。離我我所。不覺彼故。三緣和合。方便而生外道不覺。計著作者爲無始虛偽惡習所熏。名爲識藏。生無明住地。與七識俱。如海浪生常生。不

斷離無常生過離。於我論等。又入楞伽下。前引楞伽與七識俱。次引楞伽爲惡習熏。今則雙具。故復引之。大意無異。言而與無明七識共俱者。與無明俱。卽前第二意。與七識俱。卽第一意。又起信下。引於三論初正引起信。卽二門之中生滅門。初具五心生滅者。依如來藏故。有生滅心。所謂不生不滅與生滅和合。非一非異。名阿賴耶識。釋曰。初二句標所謂不生不滅。下辨相。不生不滅者。是上如來藏。自性清淨心。因無明風動。舉體隨緣。作生滅心。不相捨離。故云和合。非謂別有生滅來與真合。此

心所以生滅者。因無明生此生滅心。原從本覺而起。故有二義而無二體。故下論云。如大海水。因風波動。水相風相。不相捨離。乃至廣說。此中名動爲風水之動。是風相。動之濕是水相。以水舉體動故。水不離於風相。無動而非濕故。動不離於水相。心亦如是。不生滅心。舉體動故。心不離生滅。相生滅之相。無非真故。生滅不離於心相。如是名爲和合。此是不生滅心與生滅合。以是隨緣門故。非是生滅與不生滅合。以此不是向本真如門故。言非一非異者。真如全體動故。心與生滅非異。而恒不變。

真性。故與生滅不一。此約三細以爲生滅。則第八中已含動靜。若楞伽經云。七識染法爲生滅。以如來藏淨法爲不生滅。以此二和合爲阿賴耶識。以和合故。非一非異。非一異者。就麤顯說。然非一非異廣義。如十忍品。如幻忍明。又如來藏名。初品已釋。言不生滅等者。且公云。性該始終。體非起盡。體徧迷悟。性非解惑。故云不生不滅。若不覺知。能令生死不斷。名生始覺能滅生死。故名爲滅。又如達磨經頌下。先舉經偈。而云達磨經頌者。攝論第二釋所知依中云。此中最初且說所知依。卽阿賴耶。

也世尊何處說阿賴耶識名阿賴耶。謂薄伽梵於阿毘達磨大乘經中說。釋曰。此乃通指大乘經爲對法經耳。文中但舉上半。下半云。由此有諸趣。及涅槃證得攝論等下。初卽法相宗等者。等取瑜伽雜集。彼釋云。無始者。初際無故界者。因義。卽種子也是識因種。謂一切法。此唯雜染。非是清淨。彼一切法等所依者。能任持故。非因性義。所依能依性各異故。若不爾者。界聲已了。無假依言。故第三論云。此中聞熏習爲是阿賴耶識。自性爲非阿賴耶。自性下論答云。此聞熏習。隨在一種所依轉處。寄

在異熟識中。與彼和合俱轉。猶如水乳。然非阿賴耶。自性是彼賴耶。對治無分別智種子性故。下二句易了。明知賴耶。但是生滅。非真性成。實性論翻下。卽法性宗疏中一句。但是義引。彼論具云。無始時來性。作諸法依止。依性有諸道。及證涅槃果。卽第四論。彼論釋云。此偈明何義。無始時來性者。如第四論。彼論釋云。此偈明何義。無始時來性者。如經說言。諸佛如來。依如來藏說。諸衆生無始本際不可得知。知故所言性者。如聖者勝鬘經言。世尊。如來說。如來藏者。是法界藏。出世間法身藏。出世間上上藏。自性清淨法身藏。自性清淨如來藏。故作

諸法依止者。如聖者勝鬘經言。是故如來藏是依持。是住持。是建立等。次論云。依性有諸道者。如聖者勝鬘經言。世尊。生死者。依如來藏。世尊。有如來藏。故說生死。是名善說故。及證涅槃果者。如聖者勝鬘經言。世尊。依如來藏故有生死。依如來藏故證涅槃。世尊。若無如來藏者。不得厭苦果求涅槃。不欲涅槃。不願涅槃故。此明何義。明如來藏究竟如來法身不差別。真如體相畢竟云佛性體。於一切時。一切衆生身中。皆無餘盡。應知以此等文下。先正結。以上諸教。皆如來藏而爲識體。故知心

性卽如來藏。此外無法。故爲深也。又唯識下引唯識文。結同法性。故論云。此諸法勝義。亦卽是真如。常如其性故。卽唯識實性。釋曰。旣用真如爲識實性。明知天親亦用如來藏而成識體。但後釋論之人。唯立不變。故云過歸後輩。况世親造佛性論。廣用勝鬘。

佛子。心性是一。

疏五釋文分三。初佛子下。立宗案定。謂心之性。故是如來藏也。又心卽性故。是自性清淨心也。又妄心之性。無性之性。空如來藏也。真心之性。實性之

性不空如來藏也。皆平等無二。故云一也。鈔又妄心之性等者。此下一對成上二義。然有二意。一如次成上。謂妄心之性成心之性。以性相不同故。真心之性成上卽性。真心卽性故。二者通成。謂此之二性別明。二藏前之二性皆具二藏。但爲妄覆名如來藏。直語藏體。卽自性心故。此自性清淨真心。不與妄合。名爲空藏。具恒沙德。名不空藏。前明卽離。此明空有。故重出也。皆平等無二者。上二卽離不同。由心之性故不卽。由心卽性故不離。不卽不離爲心之性。後二卽空之實爲不空。卽實之空不離爲心之性。

爲空藏。空有不二爲心之性。然空有無二之性。卽是不卽不離之性。故但云一。

云何見有種種差別。

疏二設難相違難。分二初云何下。總顯相違。謂心性旣一。云何而有五趣諸根。總別殊報。故云種種。鈔五趣等者。如持五戒。招得人身。是總報業。由於因中有瞋忍等。於人總報而有妍媸。名別報業。唯識亦名爲引滿業。能招第八引異熟果。故名引業。能招第六滿異熟果。名爲滿業。俱舍亦云一業。引一生多業。能圓滿猶如續像。先圖形狀。後填衆

60

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

撰述

華嚴疏金卷三

七

七

彩等然其引業能造之思要是第六意識所起若其滿業能造之思從五識起。

所謂往善趣亞趣諸根滿缺受生同異端正醜陋苦樂不同。

疏二所謂下別示相違十事五對約總報明趣有善惡善謂人天惡謂三塗下四對皆約別報諸根下於前善惡趣中各根有滿缺謂眼等內根受生下於前滿缺中各生有同異謂四生不同勝劣處異端正下於上同異生處各貌有妍媸苦樂下於上妍媸各受有苦樂上之五對前前皆具後後後上妍媸各受有苦樂

後必帶前前展轉異同成多差別故云種種不同心性是一其義安在鈔展轉異同等者都有六十二句謂初對是善惡爲二第二對開二成四兼前二成六第三對開四成八配前六成十四第四對開八成十六兼前十四成三十第五對開十六成三十二配前三十成六十二此約以後添前故成六十二。就實而言但有三十二以後開前前更無體故如開善惡趣各成滿缺但有四耳謂一善趣根滿二善趣根缺三惡趣根滿四惡趣根缺此四之外更無有別善惡趣故又若二二開之唯成

三十二。若更展其四生。則復成多句。謂第三對。先以四生乘上四句。四四成十六句。更有勝劣。乘十六已有三十二。配六已成三十八。後後開之。句數更多。第四對開成六十四。第五對開成一百二十八。若從初善惡開爲六趣。則句數更多。並可思準。故云後後必帶前前。展轉異同。或多差別。

業不知心。心不知業。受不知報。報不知受。心不知受。受不知心。因不知緣。緣不知因。智不知境。境不知智。疏第三結成前難。此文意稍難見。畧爲二解。一依古德作遷救重難。如前第二問意中辨。一直結成

前難。且依此釋文。自有三意。由前難意亦有三故。一直問所以。故今結云。非但本性是一。我細推現事。各不相知。既有種種。何緣不相知。既不相知。誰教種種。若謂業令種種。業不知心。若謂心令種種。心不知業。一一觀察。未知種種之所由也。二懷疑。重難。故結云。既不相知。爲是一性。爲是種種。三作相違難。結云。一性隨於種種。卽失真諦。種種隨於一性。卽失俗諦。今見種種。又不相知。此二互乖。云何並立。

疏二正釋本文。亦有十事五對。畧爲二解。一通二

別初通謂總觀前來總別二報。業不下就先業因。約能所依以難。然有二意。一約本識。謂業是能依。心是所依。離所無能。故云業不知心。離能無所。故云心不知業。以各無體用。不能相成。既各不相知。誰生種種。下並準之。二約第六識。業是所造。心是能造。並皆速滅。起時不言我起。滅時不言我滅。何能有體而得相生成種種耶。鈔一約本識者。業是心所。故依於心。心是第八爲根本依。離所無能下。釋不相知義。以相待門。釋言離所無能者。既無所依心王。亦無能依之業。今依心有業。業從緣生。

故無自性。不能知心。離能無所者。離能依業。則心非所依。今由業成所依。所依無性。故不能知業。以各下結。謂各從緣成。性空無體。相依無力。故云無用。覺首亦云。無體用故。故不相知。二約第六識者。卽以第六識名心。從於積集。通相說故。謂第六識人執無明。迷真實義。異熟理故。以善不善相應思。造罪等三行。熏阿賴耶。能感五趣愛非愛等。種種報相。但云六者。謂五識無執。不能發潤。故非迷理。無推度故。不能造業。雖造滿業。亦非自能。但由意引。方能作故。並皆速滅者。明不相知。通相而言。皆

1

2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

約無體用故別相而言。用門不同此用二門一無常門故言並皆速滅淨名弟子品云優波離一切法如幻如電諸法不相待乃至一念不住諸法皆妄見故心業皆空下經云衆報隨業生如夢不真實念念常滅壞如前後亦爾故由無常不能相知起時不言我起下卽無我門約法無我明不相知故淨名問疾品云又此病起皆由著我是故於我不應生著既知病本卽除我想及衆生想當起法想應作是念但以衆法合成此身起唯法起滅唯法滅釋曰上以法遣我次經云又此法者各不相

知起時不言我起滅時不言我滅釋曰此總顯我空明不相知次經又云彼有疾苦薩爲滅法想當作是念此法想者亦是顛倒顛倒者卽是大患我應離之云何爲離謂離我我所云何離我我所謂離二法云何離二法謂不念内外諸法行於平等云何平等謂我等涅槃等所以者何我及涅槃此二皆空以何爲空但以名字故空如此二法無決定性釋曰此破法顯空今但取我法不相知義故畧用二句次下經云得是平等無有餘病唯有空病空病亦空釋曰此以空空破空非今所要因便

引來成一段義畢耳。

疏受不下。約得報果時難能所受謂受是報因。卽名言種爲業所引受所受報離報無受故云受不知報。離受無報故云報不知受以並無體故準前應知。鈔第二對者此釋受不知報報不知受是能受之因報是所受之報此上總明謂受是報因下別釋卽名言種者唯識第八云復次生死相續由諸習氣然諸習氣總有三種一名言習氣二我執習氣三有支習氣名言習氣者謂有爲法各別親種名言有二一表義名言卽能詮義音聲差

別二顯境名言卽能了境心心所法隨二名言所熏成種作有爲法各別因緣釋曰言各別親種者三性種異故能詮義聲者揀無詮聲彼非名故名是聲上屈曲唯無記性不能熏成色心等種然因名起種名名言種顯境名言卽七識見分等心非相分心相分心者不能顯境故此見分等實非名言如言說名顯所詮義此心心所法能顯所了境如似彼名能詮義故隨二名言皆熏成種二我執習氣三有支習氣並如六地有支卽是今文爲業所引能引之業故唯識云三有支習氣謂招三界

異熟業種有支有一。一有漏善卽能招可愛果業。二諸不善卽能招非愛果業。隨二有支所熏成種令異熟果善惡趣別。故論頌云。由諸業習氣二取習氣俱前異熟既盡復生餘異熟此能引業。卽諸業習氣此名言種。卽二取習氣言爲業所引者。卽彼俱義親辦果體。卽由名言若無業種不招苦樂如種無田終不生芽。故此名言由業引起方受當來異熟之果苦樂之報。故六地云業爲田識爲種離報無受下釋不相知亦約相待空故。

疏心不下約名言因就能所依難謂前能受報因

依心無體故無相知餘義同前鈔三約名言等者標也卽將第二對中能受名言之因。對第一對中所依本識前以業依識難今以種依現行難謂前能受報因下釋不相知但釋受不知心不解心不知受故結云餘義同前若具應云所依心體若離能依亦無所依故不能相知。

疏因不下約因緣親疎相假難謂所引名言爲因能引業爲緣相待相奪各無自性如不自生等準之鈔四約因緣等者取前第二對中所引名言及能引業相對以明此卽標也謂所引下出體相

60

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

撰述

華嚴疏錄卷三

三

五

待相奪下。釋不相知。言相待者。業無識種。不親辦體。識無業種。不招苦樂。既互相待。卽各無自性。言相奪者。以業奪因。唯由業招。故因如虛空。以因奪緣。卽唯心爲體。故業如虛空。互奪獨立。亦不能相知。互奪兩亡。無可相知。如不自生等者。引例以釋。以緣奪因。故不自生。以因奪緣。故不他生。因緣合辨。相待無性。故不共生。互奪雙亡。無因豈生。以此不生。類於不知。居然易了。卽以因爲自。以緣爲他。合此爲共。離此爲無因。互有尚不相知。互無豈能相知。

疏智不下。約境智相對。相見虛無難。謂境是心變。境不知心。心托境生。心不知境。以無境外心。能取心外境。是故心境虛妄。不相知也。鈔五約境智等者。相卽相分。見卽見分。諸心心所。畧有二分。廣說有四。如下當辨。謂境是心變下。明不相知義。先約唯識能所變釋。後以無境外下。約當經互融以說。故下經云。無有智外如爲智所入。亦無如外智。能證於如。無有少法與法同住。以舉心攝境。則無心外之境。舉境攝心。則無境外之心。以性無二。相卽性故。相隨性融。隨一皆攝。上約真心。後心境虛

妄下。約其妄心。眞卽互融。妄俱無體。故下答中云。  
能緣所緣力。種種法出生。速滅不暫停。念念悉如  
是。卽顯妄無性。故不相知也。然上五對。初及第四。  
唯約因中。第二一對。因果對辨。第三一對。心舍因  
果。第五一對。義通因果。修因二取。卽名言等。故唯  
識論釋二取。二中總有四義。一者相見。二者名色。  
三者王所。四者本末。末卽六識異熟。本卽第八異  
熟。四種二取。皆能熏發。親能生彼本識上功能。名  
二取習氣所變心境。卽通果也。又能變之心是因。  
所變之境是果。心託境生。俱通因果。

疏二別觀者。以初二對。結趣善惡。趣善惡者。正由  
業熏。受總報故。鈔第二別觀者。上云通觀五對  
之中。一一通前善惡趣等五對本難。今卽以斯五  
對。別對前五。而前後鉤鎖。但有四重。細尋可見。以  
初二對結趣善惡者。標也。趣善惡者。正由業熏。是  
第一對。業不知心。心不知業。此對爲因。次云受總  
報故。卽第二對。受不知報。報不知受。初對爲因。受  
第二對報。總報卽是趣善惡故。  
疏二復以第二及第三對。結受生同異。初對以名  
言種。對所生處。次對以名言種。對能依本識。鈔

二復以第二等者鉤取前二對中第二對卽重明受不知報報不知受受卽名言種故云初對以名言種對所生處謂亦由識種。往所生處故初地云於三界田中復生苦芽次對以名言等者卽心不知受受不知心受卽名言種心卽能依本識者依名言種招現行識故識爲能依則此心言通因及果上約因中本識故爲所依今約果中故爲能依疏三復以第三及第四對結苦樂不同及端正醜陋初對觀現受時次對觀苦樂因及彼妍媸皆由緣令異謂損益因成苦樂果以瞋忍因成妍媸果。

鈔三復以第三等者卽通以此二對雙結前二對初對觀現受時者卽心不知受受不知心謂亦由受因受苦樂體及妍媸故若無識種本識此二亦無所依次對觀苦樂因等者卽因不知緣緣不知因謂損益下別示二對之相由損他業感於苦報由益他業感於樂報以瞋恚業感於醜陋由忍辱業感於端正此中言因名緣爲因因此中言果是別報果。

疏四復以第四及第五對結諸根滿缺亦由滿業因緣有損他益他之異故成內六處滿缺之果又

由內根有滿缺故於分別位了境不同並皆無性各不相知既不相知誰令種種鈔四復以第四等者此上總明亦由滿業下別說其相滿業卽第四對因不知緣緣不知因緣卽是業唯取滿業由損他眼耳成育聾等由益他六根等成六處滿足又由內根等者卽第五對智不知境境不知智謂智於境有信進念定慧之滿足則受果中亦具五根明利勝上若智於境信等隨闕或非深厚則得果時五根隨缺或成下品並皆無性下上別釋中但出能對所對二種法體今則總明不相知義在

文易了意云並各相依從緣無性何有能所熏等而能相知既不相知者此但約第一直問意結亦應帶疑云爲是種種爲是一性結成難云一性隨於種種則失真諦種種隨於一性則失俗諦一性卽不相知亦應結云種種隨於不相知則失俗諦不相知隨於種種則失真諦

時覺首菩薩以頌答曰

仁今問是義爲曉悟羣蒙我如其性答惟仁應諦聽疏二答中分二初時覺首下讚問許說上半讚問謂文殊自究深旨一向爲他仁心弘益也次句許

說分齊稱性說故也後句勸聽。言同意別也。故令  
諦受。

諸法無作用亦無有體性。是故彼一切各各不相知。  
疏一正答。答勢縱橫具答前來三重問意分爲二。  
前五答前結成之中以何因緣而不相知。用此釋  
成。答前難故首而明之。後五正答前難。今初分二。  
先一法說後四喻況。今初意云特由從緣種種  
故不相知也。

疏卽此偈上半出因。下半結歸本宗。後四卽爲同  
喻。量云眼等是有法定不相知故是宗法。因云從  
緣無體用故同喻云如河中水。河水無體用。河水  
不相知。眼等無體用。眼等不相知。若以緣起相由  
門釋者。初句因緣相假互皆無力。次句果法含虛。  
故無體性。至下喻中別當釋之。是故虛妄緣起畧  
有三義。一由互相依各無體用。故不相知。二由依  
此無知無性方有緣起。三由此妄法各無所有。故  
令無性真理恒常顯現現文但有初後二意。鈔  
初因明立量。懸指後四以爲同喻。則此偈中但有  
宗因。二緣起相由然緣起相由具力無力及有體  
無體。今顯不相知理。但明無力無體。又因中亦有

無體義。今取義便。因緣相假。但明無力。謂因假緣。故因無力。緣假因。故緣無力。果上亦有無力義。今取義顯。但明無體。謂全攬因成。緣成無性。故云舍虛無體。下四喻中。皆有無體用義。故指下明。二結示緣起深旨。然此正結緣起相由門。兼結上因明立量。以立量中。亦說不相知爲宗故。卽三義中初義。現文但有初後二意者。全取一偈。卽是初意。唯取不相知言。卽是後意。其第二意。至後五偈答本難中。方用斯義。

疏言諸法者。非唯舉前十事五對。亦該一切有爲

法也。果從因生。果無體性。因由果立。因無體性。因無體性。何以感果之用。果無體性。豈有酬因之能。又互相待。故無力也。以他爲自。故無體也。下半結中是故者。是前體用俱無故。故彼一切法。各各不相知也。鈔果從因生等者。上取義便。但因無力。說果無體。今欲盡理。故具舉之。則上句諸法。通於因果。先以因緣門明因果俱無體。因無體性下。以上無體。釋成因果無用。體尚不立。用安得存。又互相待下。以相待門明無體用。先明因果無用。故云無力。以他爲自下。明因果無體。旣全攬他。故無自

體。

譬如河中水。湍流競奔逝。各各不相知。諸法亦如是。  
疏第二喻況。畧有二意。一以此四喻通釋諸法不  
相知言。二別對前文諸不相知。兼通前設難。今初  
以四大爲喻。然各上三句喻況。下句法合。然此四  
喻各顯一義。一依水有流注。二依火焰起滅。三依  
風有動作。四依地有任持。法中四者。一依真妄相  
續。二依真妄起滅。三妄用依真起。四妄爲真所持。  
然此法喻。一一各有三義。一唯就能依。二依所依。  
三唯所依。今初喻中。唯就能依者。流也。然此流

注。有十義。不相知而成流注。一前流不自流。由後  
流排故。流則前流無自性。故不知後。二後流雖排  
前。而不到於前流。故亦不相知。三後流不自流。由  
前流引故。流則後流無自性。故不能知前。四前流  
雖引後而不至後。故亦不相知。五能排與所引無  
二。故不相知。六能引與所排無二。故不相知。七能  
排與所排亦無二。故不相知。八能引與所引亦無  
二。故不相知。九能排與能引不得俱。故不相知。十  
所排與所引亦不得俱。故不相知。是則前後互不  
相至。各無自性。只由如此無知無性。方有流注。則

不流而流也。肇公云：江河競注而不流，卽其義也。然上云前後者，通於二義。一生滅前後，謂前滅後生，互相引排。二此彼前後，卽前波後波。小乘亦說當處生滅無容，從此轉至餘方，而不知無性緣起之義耳。鈔然此流注下，二別示不相知，謂欲顯不相知理，故寄前後流異，成其十門。若不說前後之流，將何不相知耶？一河之水，不出前後，則千里九曲皆悉無性，不相知矣。然雖十義，本唯二流，成兩重能所，前流望引爲能，望排爲所；後流望排爲能，望引爲所。以斯四義，相集成十。初及第三，以爲

所故無性無知，二四兩門，約不相到。五六二門，約無二體。以後流是能排，卽所引故；前流所排，卽能引故。七八約緣成故，無二謂。七中能排是後，所排是前，亦無二者。要有所排，方有能排。此二相成，故亦無二。八約能引亦然。九十約不俱，故無知者。然其能排是後，能引是前，不得俱者，後爲能排，前湏爲所排，不得卽此名爲能引。義門別故，各爲不俱。第十例，此前流爲所排時，後流湏爲能排，不得爲所引。故云不俱。肇公下四引他證成，卽物不遷論，然其相連總有四句。論云：旣無往反之微朕，有何

物而可動乎。然則旋嵐偃岳而常靜。江河競注而不流。野馬飄鼓而不動。日月歷天而不周。復何怪哉。今四喻中。但用水風。彼無火地。然上云下。五別釋前後二字。一生滅前後者。此卽堅說。如壯與老。謂此流水利那生滅前利那滅。後利那生。二此彼前後者。猶如二人同行狹徑。後人排前。前人引後。此卽橫說。分分之水。皆有前後。乃至毫滴亦有前毫後毫。故聚衆多。皆成流注。則無性矣。小乘亦說下。六揀定不相知理。先舉小乘。而不知下。舉大異小。小乘卽俱含論業品中。釋身表許別形。非行動。

爲體。以諸有爲法有利那盡故。論文初句。論王標有宗義下三句。破正量部。以正量部謂以動身爲身表體。故論破之。然正量部心心所法。則有利那。此之動色無有利那。今論王明有爲法。皆有利那。何以知有後有盡。故旣後有盡。知前有滅。故論云。若此處生。卽此反滅。無容從此轉至餘方。釋曰。此生此滅。不至餘方。同不遷義。而有法體。是生是滅。故非大乘。大乘之法。緣生無性。生卽不生。滅卽不滅。故遷則不遷。則其理懸隔。然肇公論。則含二意。顯文所明。多同前義。故云傷夫人情之惑久矣。目

對真而莫覺。既知往物之不來。而謂今物而可往。往物既不來。今物何可往。何則。求向物於向。於向未嘗無責。向物於今。於今未嘗有。於今未嘗有。以明物不來。於向未嘗無。以明物不去。覆而求今。今亦不往。是謂昔物自在昔。不從今以至昔。今物自在今。不從昔以至今。故仲尼曰。回也見新交臂。非故如此。則物不相往來明矣。既無往反之微朕。又何物而可動乎。卽云。然則旋嵐等。下文又云。若古不至今。今亦不至古。事各性住。何物而可去來。釋曰。觀筆公意。旣以物各性住。而爲不遷。則濫小乘。

無客。從此轉至餘方。下論云。故談真有不遷之稱。導物有流動之說。則以真諦爲不遷。而不顯真諦之相。若但用於物。各性住爲真諦。相寧。非性空。無可遷也。不真空義。方顯性空義。約俗諦爲不遷耳。疏二。依所依者。謂前流後流。各皆依水。悉無自體。不能相知。然不壞流相。故說水流。  
疏三。唯所依者。流既總無。但唯是水。前水後水。無二性。故無可相知。是則本無有流而說流也。  
疏二。法中三義者。一流喻能依妄法。二妄依真立三妄盡唯真。初中妄緣起法。似互相籍。各不能相

到悉無自性。故無相知。是則有而非有也。二依所依者。謂此妄法。各各自虛。舍真方立。何有體用。能相知相成。卽由此無知無成。舍真故有。是則非有而爲有也。三唯所依者。謂能依妄法。迥無體用。唯有真心。挺然顯現。旣無彼此。何有相知。正由此義。妄法有卽非有。以非有爲有。復說真性。隱卽非隱。以非隱爲隱。鈔妄法有卽非有。是初義。隱卽非隱。是第二義。以正爲事隱之時。而有所依故。以非隱爲隱。卽第三義。理常現故。

疏此上三意。卽三種答。答上三種問。思之。鈔思

之者。以易見故。若其說者。第一妄法有而非有。答前直問。旣有種種。何緣不相知。謂種種是妄有體。卽非有故。不相知。二答懷疑爲是種種爲不相知。故今答云。能依妄法。依所依真。妄常種種。真常無知故。三答結成難者。卽妄卽真。故種種不乖不相知也。

疏何故以水喻真心者。以水有十義。同真性故。一水體澄清。喻自性清淨心。二得泥成濁。喻淨心不染而染。三雖濁不失淨性。喻淨心染而不染。四若澄泥淨現。喻真心惑盡性現。五遇冷成冰。而有硬

用喻如來藏與無明合。成本識用。六雖成硬用而不失軟性。喻卽事恒真。七煖融成軟。喻本識還淨。八隨風波動。不改靜性。喻如來藏隨無明風波浪起滅而不變。自不生滅性。九隨地高下。指引流注而不動。自性。喻真心隨緣流注。而性常湛然。十隨器方圓而不失自性。喻真如性。普偏諸有爲法而不失自性。畧辨十義。少分似真。故多以水爲喻。此義見文。雖似不具。而大通衆經。

亦如大火聚。猛燄同時發。各各不相知。諸法亦如是。疏第二依火燄起滅。喻中三義同前。初唯焰者。謂

焰起滅。有其二義。一前焰謝滅。引起後焰。後焰無體。而不能知前焰。前焰已滅。復無所知。是故各各皆不相知。二前焰若未滅。亦依前引無體。故無能知。後焰未生。故無所知。是故彼亦各不相知。妄法亦爾。利那生滅。不能自立。謂已滅未生。無物可知。生已則滅。無體可知。是故皆無所有也。斯則流金爍石而不熟也。鈔第二依火等者。下之三喻。文勢稍畧。隨其三義。便以法合。今初唯燄。喻中二義一明。後不知前。二明前不知後。二合先總。謂已滅下。別然法喻。俱用生滅門釋。而有小異。喻中用前

念滅後念生釋。今法合中亦用前滅後生。正合前  
燄後燄兼三時門。今初已滅者前念也。未生者後  
念也。故此二念一向無物。生已卽滅者前後二念  
皆卽生卽滅。並皆緣生。故言無體。體無實。故言兼  
三時門者。謂一念之上。卽有三時。已滅爲已生。未  
生爲未生。生已卽滅是生時。故淨名云。若過去生。  
過去生已滅。若未來生。未來生未至。若現在生。現  
在生無住。經云比丘汝今卽時亦生。亦老亦滅。故  
三時無體。無可相知也。斯則流金者。卽莊子意說  
於至人。大水稽天而不溺。大旱金石流火山燒而  
隔矣。

疏二依所依者。謂彼火焰。卽由於此無體無用。不  
相知故。而有起滅虛妄之相。是則攬非有而爲有  
也。妄法亦爾。依此無所依之真理。方是妄法。是亦  
非有爲有也。鈔二依所依者。亦先喻後合。然與  
水喻釋有影響。水喻以水爲所依。今以焰無體用  
而爲所依。若例前流依於水者。應以火爲所依。火

是熟性。身所觸故。焰是色動。有形顯故。若依此釋。應云前焰後焰。皆依於火。以無自性。故無相知。是則依水依火。明二空所顯不空真理。以爲所依。若無體用爲所依者。則顯依他無性。即是圓成。二空真理。以爲所依。顯義無方。故有影畧。下唯所依。亦準斯釋。又若例後風喻。風依物動。則火依薪有。薪爲可燃。火是能燃。故以燃因可燃。則燃無體。可燃因燃。則可燃無體。則以無性可燃而爲所依。

疏三。唯所依者。推起滅之焰。體用俱無。無焰之理。挺然顯現。是則無妄法之有。有妄法之無。湛然顯

現。遂令緣起之相。相無不盡。無性之理。理無不現。鈔是則無妄下。二結上三義也。然有無有二。一定性有無。二真空妙有。今無妄法之有。則無定性之有。非斷無矣。有妄法之無。是真空之無。便爲妙有。是故若舉妄取真。則妄有真空。如三論說。若真妄對辨。則妄空真有。如涅槃明。遂令緣起下。覆成上義。上句成無妄法之有。下句成有妄法之無。相無不盡。是初門。理無不現。是第三門。合上二句爲第二門。

疏上三義中。亦如次喻。答前三問也。下二喻準知。

鈔上三義中下。對問會通。唯談無性。故不相知。答直問也。能依種種所依無二。答懷疑也。卽事同真。故不相違。答設難也。在義易了。故云準知。若賢主意問者據其初意。答者用其後二。亦是一理。是則初義。兩家共用。下當重明。

又如長風起。遇物咸鼓扇。各各不相知。諸法亦如是。疏第三。依風有動作喻。妄用依真起。三義同前。

鈔三。依風有動作喻。有標釋結而無對問。卽以水樹等而爲所依。餘大同前。

疏一。唯動者離所動之物。風之動相。了不可得。無可相知。妄法亦爾。離所依真體。不可得。故無相知。斯則旋嵐偃岳而常靜也。鈔斯則旋嵐偃岳而常靜者。卽肇公言。亦云隨風。卽興雲之風。北方風也。亦是劫壞時風。

疏二。依所依者。謂風不能自動。要依物現動。動無自體。可以知物。物不自動。隨風無體。不能知風。法中能依妄法。要依真立。無體知真。真隨妄惡。無相知妄。

疏三。唯所依者。謂風鼓於物。動唯物動。風相皆盡。無可相知。妄法作用。自本性空。唯所依真。挺然顯

現。

疏是故妄法全盡而不滅。真性全隱而恒露。能所熏等。法本自爾。思之可見。鈔是故妄法下。結文有兩對。具上三門。妄法全盡而不滅者。單取妄法全盡是初門。將上而不滅對下真性全隱爲第二門。以不滅爲能依。全隱爲所依。故下句中而恒露卽第三門。

又如衆地界。展轉因依住。各各不相知。諸法亦如是。疏第四。依地有任持者。喻妄爲真所持。三義同前。疏初地界因依有一種義。一約自類。二約異類。前

中從金剛際。上至地面。皆上依下。下持上。展轉因依而得安住。然上能依。皆離所無體。而能知下。然下能持。皆亦離所無體。可令知上。又上上能依。徹至於下。無下可相知。下下能持。徹至於上。無上可相知。是故若依若持。相無不盡。所現妄法。當知亦爾。必龐依細。謂苦報依於業。業依無明造。無明依所造。展轉無體。無物可相知。斯則厚載萬物。而不仁也。肇公亦云。乾坤倒覆。無謂不靜也。鈔初唯今初云。地界因依。則喻勢小異。一約自類者。猶如

累整餘並可知。斯則厚載者不特仁德也。老子云。天地不仁。以萬物爲芻狗。經云。譬如大地荷四重。任而無疲厭也。次肇公下亦不遷論末。總結云。然則乾坤倒覆。無謂不靜。洪水滔天。無謂其動。苟能契神於卽物。斯不遠而可知矣。坤卽是地。故得引之。

疏二約異類者。如下文地輪依水輪。水輪依風輪。風輪依虛空。虛空無所依。準此妄境依妄心。妄心依本識。本識依如來藏。如來藏無所依。是故若離如來藏。餘諸妄法各互相依。無體能相知。是則妄法無不皆盡。鈔二約異類者。卽出現品四輪相依喻。然其合文與此不同。今但借其四輪用耳。疏二依所依者。地界正由各無自性而得存立。向若有體。則不可相依。不相依故。不得有法。是故攬此無性以成彼法。法合可知。

疏三唯所依者。謂攬無性成彼法者。是則彼法無不皆盡。而未曾不滅。唯無性理而獨現前。

疏餘義同前。上通答釋成前難竟。鈔餘義同前者。第三總結。然餘義有二。一者結前三門。應云一妄無不盡。是初門。理無不現。是第三。合二爲第二。

全在第三唯所依中。故云餘義。二者對上三門以爲餘義。

疏第二別對諸不相知及通前難者。初水流轉。喻前二對不相知。答趣善惡難。以善惡趣流轉體故。鈔第二別對等者。上之四喻。通喻五對不相知義。今則別對。言及通前難者。卽往善趣等五對難也。初水流轉者。卽業不知心。心不知業。受不知報。報不知受。答趣善惡者。上云心性是一。云何見往善趣惡趣。答云。善趣惡趣。卽是總報。由業熏心。受所受報。如水漂流。言流轉體者。體卽賴耶。故唯識

云。恒轉如瀑流。釋論云。如瀑流水。非斷非常。相續長時。有所漂溺。此識亦爾。從無始來。剎那剎那。果生因滅。果生故非斷。因滅故非常。漂溺有情。令不出離。亦如起信云。如大海水。因風波動。楞伽云。藏識海常住。境界風所動等。二地經云。一切衆生爲大瀑水波浪所沒。

疏二大火喻。第二三對不相知。答前諸根受生。如火依薪。有生滅故。鈔二大火喻者。此亦鉤鎖。第二對前已用竟。今復喻之。謂受不知報。報不知受。及心不知受。受不知心。答前諸根受生者。答前二

難。由前問云。心性是一。何以見有諸根滿缺及受生同異。故今答云。諸根滿缺受生同異。皆由識種受所受報。亦依於心。如火依薪故。

疏次以長風喻前因緣。答前好醜遇物鼓扇現諸相故。鈔次以長風者。唯喻一對。謂因不知緣。緣不知因。答前好醜者。謂前問云。心性是一。云何見有端正醜陋。故今答云。今所受報有妍媸者。由業緣異。令報好醜。如風東西。令物偃倚。相各不同。疏次以地界。亦喻因緣。答前苦樂。展轉因依似輕重故。又喻前境智。答前諸根隨種所生。根等異故。異故信進等。各各不同。

鈔答前苦樂者。喻不相知。則同於風。答前苦樂則不同風。謂上問言。心性是一。云何見有受苦受樂。故今答云。善因樂果。惡業苦報。苦樂多種。如地輕重。又喻前境智者。前以風地二喻。同喻因緣。一不相知。今一地喻。喻二不相知。答前諸根者。以諸根有二義。一約眼等諸根。則火喻以答。二信等。今地喻以答。地雖是一。隨種生芽。心性雖一。隨報成異。故信進等。各各不同。

疏上來總別。並答釋成中以何因緣。各不相知竟○疏第二五偈。答前設難。文分爲三。初三偈正答前

撰述

華嚴疏錄卷三

聖

難。次一偈釋成前義。第三一偈拂迹入玄。今初先明大意。次正釋文。今初前問有三重。今此三偈。一具答上之三問。謂第一直爾問云。既有種種。何緣得不相知。前五偈答竟。既不相知。何緣種種答有四因。一妄分別故。二諸識熏習故。三由無性不相知故。四真如隨緣故。初偈具二三餘二各一義。然此四因。但是一致。謂由妄分別爲緣。令真如不守自性。隨緣成有。諸識熏習。展轉無窮。若達妄源。成淨緣起。諸宗各取。並不離象受。一非餘斯爲偏見。鈔第二五偈。答前設難。今初前問有三下。卽

先明大意。於中有二。第一總彰偈文之意。二初正明。然此四因下。二融會言諸宗者。上四因中。初一通性相二宗。二卽法相宗。三卽無相宗。四卽法性宗。據其實義。四因不闕。方成緣起甚深之趣。隨情執見。則乖聖旨。如盲摸象。不全見象。然不離象。盲不識乳。則一向奪之。今盲摸象。則是分奪。取其不能離。並順聖教。此喻卽涅槃第三十二。南經三十。答師子吼。衆生若有佛性。不須修道。自得菩提。答意云。衆生有者。定當得故。後舉此喻云。善男子。譬如。有王告一大臣。汝牽一象。以示盲者。爾時大臣受

60

1 2 3 4 5 6 7 8 9 10

1 2 3 4 5 6 7 8 9 10

王勑已。多集衆盲。以象示之。時彼衆盲。各以手觸大臣。卽還而白王言。臣以示竟爾。時大王卽呼衆盲。各各問言。汝見象耶。衆盲各言。我已得見。王言。象爲何類。其觸牙者。卽言象形。如蘆菔根。其觸耳者。言象如箕。其觸頭者。言象如石。其觸鼻者。言象如杵。其觸脚者。言象如臼。其觸脊者。言象如床。其觸腹者。言象如甕。其觸尾者。言象如蛇。善男子。彼衆盲者。不說象體。非亦不說。若是衆相。悉非象者。離是之外。更無有象。善男子。王喻如來應正徧知。臣喻方等大涅槃經。象喻佛性。盲喻一切無明衆生。是諸衆生聞佛說已。或作是言。色是佛性等。釋曰。彼經喻意。明一切衆生雖有佛性。見不明了。方執不同。然非全離。所執之法。皆佛性故。而非全見。今借此喻。以聖教深旨。總喻於象。諸宗異見。如盲所觸。並合聖理。故云不離。然非圓了。故云非是說象。故脣尊者云。依之修行。無不獲益。言受一非餘斯爲偏見者。言象如箕。不信如臼。斯爲大迷。但信諸識。不信無性真如隨緣。故爲偏見。離世間品云。受一非餘。魔所攝持。

疏上第二疑云。爲是種種。爲是一性。今答云。常種

種常一性。第三難云。一性隨於種種。則失真諦。種種隨於一性。則壞俗諦。今答云。此二互相成立。豈當相乖。性非事外。曾何乖乎。種種性空。曾何乖乎一性。由無方有一性能成種種。緣生故空。種種能成一性。鈔由無方有下。上辨不相乖。今明相成。然事理相望。畧有三義。一相違義。二不相碍義。三相作義。今用後二。其第一義。是問家所用。疏是以緣起之法。總有四義。一緣生故有。卽妄心分別有。及諸識熏習是也。二緣生故空。卽上云諸法無作用。亦無有體性。是故彼一切各各不相知。

是也。三無性故有。論云。以有空義故。一切法得成經云。從無住本立。一切法卽上隨緣是也。四無性故空。卽一切空無性是也。鈔是以緣起之法。下就四義中。二義是空有之義。謂緣生故有是有義。無性故空是空義。二義是空有所以。謂無性故有。是有所以。緣生故空是空所以。所以卽是因緣。謂何以無性。得成空義。釋云。由從緣生。所以無性。是故緣生是無性空之所以也。何以緣生得爲有義。釋云。特由無定性故。方始從緣而成幻有。是故無性。是有所以。故中論四諦品云。若人不知空。不知

空因緣。及不知空義。是故自生惱。如不善捉毒蛇。若將四句總望空有。則皆名所以。故云善捉毒蛇。若將四句總望空有。則皆名所以。故云緣生故有名。緣生故有名空。無性故有名空。良以諸法起必從緣。從緣有故。必無自性。由無性故。所以從緣。緣有性無。更無二法。而約幻有。萬類差殊。故名俗諦。無性一味。故名真諦。又所以四句。唯第三句引證成者。無性故有。理難顯故。若具證者。一緣生故有者。法華云。但以因緣有。從顛倒生故說。淨名云。以因緣故諸法生。中論云。未曾有一法。不從因緣生等。皆因緣故有義也。二緣生故

空者。經云。因緣所生無有生。論云。若法從緣生。是則無自性。若無自性者。云何有自法。三中言以有空義故。一切法得成者。亦四諦品。由前諸品。以空遣有。小乘便爲菩薩立過云。若一切法空。無生無滅者。如是則無有四聖諦之法。菩薩反答云。若一切不空。無生無滅者。如是則無有四聖諦之法。謂小乘以空故無四諦。菩薩以不空故則無四諦。若有空義。四諦等成。故有偈云。以有空義故。一切法得成。若無空義者。一切則不成。卽無性故有也。經云。從無住本。立一切法者。前已引竟。今當重引。卽

淨名第二推善不善之本。故經云。善不善孰爲本。答曰。身爲本。又問。身孰爲本。答曰。欲貪爲本。又問。欲貪孰爲本。答云。虛妄分別爲本。又問。虛妄分別孰爲本。答曰。顛倒想爲本。又問。顛倒想孰爲本。答曰。無住爲本。又問。無住孰爲本。答曰。無住爲本。又問。無住孰爲本。答曰。無住則無本。文殊師利從無住本立一切法。叢公釋云。無住卽卽實相異名。實相卽性空異名。故從無性。有一切法。餘如別說。四中應引淨名云。以何爲空。但以名字故空。如是二法。無決定性。經云。法性本空寂。無取亦無見。又云。一切法無性。是則佛真體。八地云。

無性爲性。中論始末皆明無性以顯真空。

疏是以無性緣生故空。則非無見斷見之空爲眞空也。無性緣生故有。則非常見有見之有。是幻有也。幻有卽是不有有。眞空卽是不空空。不空空故名不真空。不有有。故名非實有。非空非有。是中道義。鈔是以無性緣生故空下。第二會中道意。明此中空有。皆是中道。文中三初揅非顯是無性緣生故空者。雙牒前四句中兩種空也。此二種空並離斷見。謂定有則著常。定無則著斷。今緣生故空。非是定無。無性故空。亦非定無。定無者。一向無

0

1 2 3 4 5 6 7 8 9 10 1 2 3 4 5 6 7 8 9 10

撰述

華嚴疏錄卷三

五

未

物如龜毛兔角。今但從緣無性。故非定無。此上揀非。爲真空也。二顯是言無性緣生故有者。亦雙牒前之二有。並非常見之有。常見之有。是定性有。今從緣有。非定性有。况由無性有。豈定有耶。亦是上揀非。是幻有也。顯是幻有者。從緣無性。如幻化人。非無幻化人。幻化非真。故云幻有。亦名妙有。以非有爲有。故名妙有。然斷常見。旣由有無。則有無見。卽斷常見。疏何重牒。此有深意。斷常二見。多是邪宗。卽五利使邊見所攝。其有無見。通涉正法。但取空有相。未有契理。爲有無見。此有無見。究竟遠離。

唯大菩薩。故淨名云。說法不有亦不無。以因緣故。諸法生。有無二邊。無復餘習。下經善友歷事諸佛。以證法門。尚云猶於諸法中。無而計爲有等。幻有卽是不有有下。第二立中道義。此中有三中道。一幻有上。自爲中道。謂有與不有。此二無碍。故爲中道。故云有是不有有。言不有者。舉體全空。無所有。故重言有者。亦名非不有。謂不待破差別相。故大品云。諸法無所有。如是有故。非有非不有。名爲中道。是幻有義。二言真空。是不空空者。卽真空中。以明中道。謂不空與空。無障礙故。言不空者。以空

撰述

華嚴疏錄卷三

三

和

無空相故重言空者亦名非不空謂餘一切相無不盡故是故非空非不空名爲中道是真空義經云空不空不可說名爲真空中論云無性法亦無一切法空故重言不空空故名不真空不有有故名非實有者旁會異義意不殊前卽通會肇公不真空論康公云萬法不真故空不得肇意遠公云不遷當俗俗則不生不真爲真真但名說却得肇意此中真空非是前文對妙有之真空此中真空是所破病人謂真諦一向無物爲真空義是故肇公以不不之云不一向是無物故云不真空謂卽

萬有之無性名爲真諦何曾一向是空故云不真空也此不真空卽前真空不有有故名非實有者對上不真空故爲此句真空實有並是二邊不真非實卽爲正理非空非有下三結成中道然其正意合前真空二義總名非空合前幻有一義皆名非有空有不二故爲中道又以幻有爲非空以真空爲非有皆中道義實則上空有之上有二中道兼此爲三下融合中更當廣說

疏又開此空有各有二義一真空必盡幻有以若不盡幻有非真空故一真空必成幻有以若碍幻

0123456789

123456789

撰述

華嚴疏卷三

三

和

有非真空故。鈔又開此空有下。二開義有二。先正明。一真空必盡幻有。是相害義。亦法界觀中真理奪事門。以事攬理成。遂令事相無不皆盡。唯一真理平等顯現。以離真理外無有少事可得故。如水奪波。波無不盡。般若中云。是故空中無色無受想行識等。二真空必成幻有者。是相作義。及無碍義。亦法界觀中依理成事門。謂事無別體。要因真理而得成立。以諸緣起皆無自性。由無性理。事方成故。如波攬水而成立故。亦是依如來藏得有諸法。故大品云。若諸法不空。則無道無果。又中論云。

以有空義故。一切法得成。

疏一幻有一義者。一幻有必覆真空。以空隱有現故。二幻有必不得真空。以幻有必自盡。令真空徹現故。鈔一幻有必覆真空者。卽相違義。亦法界觀中事能隱理門。謂真理隨緣能成事法。然此事法既違於理。遂令事顯理不現也。以離事外無有理故。如波奪水。水無不隱。是則色中無空相也。二幻有必不得真空。是不相碍義。亦相作義。亦法界觀中事能顯理門。謂由事攬理故。則事虛而理實。以事虛故。全事之理挺然露現。如由波相虛。令水

露現故論云若法從緣生是則無自性然上真空二義第二義中以相作攝無碍義今幻有第二義中乃以不相碍攝於相作其故何耶理實空有第二義中皆含相作及無碍義而影響者事依理成故前有相作理非事造故今無相作而上三義中言空有相作者但約事法能顯理故名作理耳然此四義亦即是前緣生故空等四義也一真空必盡幻有是無性故空義二必成幻有是無性故有義三幻有必覆真空是緣生故有義四必不得真空是緣生故空義前四總明空有所以今四正說

空有之相

疏文殊各以初義致難覺首各以後義而答以初二義空有異故以後二義空有相成故然此二不二謂有非有無二爲一幻有空非空無二爲一真空又非空與有無二爲一幻有空與非有無二爲一真空又幻有與真空無二爲一味法界卽中道義離相離性無障無碍無分別法門思以準之鈔然此二不二下三融合於中二先正明卽合前四義湏知四義兩處名異上真空必盡幻有是真空上空義二必成幻有是真空中不空義三幻有

必覆真空是幻有上有義四必不碍真空是幻有上非有義又湏知有非有空非空各有二義一有上二義者一是不壞有相義二是遮斷滅義則名有爲非不有二非有上二義者一離有相義二即是空義三空上二義者一不壞性義二遮定有義故名空爲非不空四非空上二義者一離空相義二卽是有義已知名義今疏融合乃有五重爲五種中道一云謂有非有無二爲一幻有者此是有上二義自合然取有上不壞相義非有上離有相義故合爲一幻有是俗諦中道空非空無二爲一

真空者卽空上二義自合然取空上不壞性義非空上離空相義故合爲一真空爲真諦中道前一爲卽相無相之中道此一爲卽性無性之中道亦存泯無二義又非空與有無二爲一幻有者上一對空有自合此下一對空有四義交絡而合今此第三卽取真空上非空義及幻有上有義二義相順明其不一然是非空上取卽是有義有上取遮斷滅義故得共成幻有爲非空非不有存泯無碍之中道空與非有無二爲一真空者卽第四取真空上空義幻有上有非有義二義相順明其不二然

是空上遮定有義。非有上。卽是空義。故二相順得成真空。爲非有非不空。存泯無碍之中道。三是存俗泯真。此是存真泯俗。又三是空徹於有。今是有徹於空。皆二諦交徹。又幻有與真空無二爲一味法界者。卽第五總合前四。令其不二。然上各合交徹。並不出於真空幻有。故今合之爲一味法界。爲二諦俱融之中道。然三四雖融二諦。而空有別融。今此卽空有無碍。卽是非空非有無碍。舉一全收。若以真同俗。唯一幻有。融俗同真。唯一真空。空有無二爲雙照之中道。非空非有無二爲雙遮之中道。遮照一時。存泯無碍。故第二結歎云。離相離性。無障無碍。無分別法門。以幻有爲相。真空爲性。又空有皆相。非空非有爲性。又別顯爲相。總融爲性。今互奪雙融。並皆離也。無分別法。但約智說。唯無分別智。方究其源矣。無障無碍。通於境智。謂上之五重多約境說。心智契合。卽爲五觀。五境旣融。五觀亦融。以俱融之智。契無碍之境。則心境無碍。心中有無盡之境。境上有無碍之心。故要亡言。方合斯理。總爲緣起甚深之相。餘義如玄中已明。

疏復次性有二義。一者有義。二者空義。復有二義。斯理總爲緣起甚深之相。餘義如玄中已明。

一者不變。二者隨緣。以有義故。說二空所顯。卽法性本無生也。以空義故。說依他無性。卽是圓成。卽各不相知。以有義故。說於不變。以空義故。說於隨緣。此二不二。隨緣卽是不變。不變故能隨緣。鈔復次性有二義下。第四別釋性義。於中有四。一順釋。二反成。三結歸中道。四結勸修學。今初文有四節。一雙標。二門。二以有義故。說二空所顯下。釋空有義。三以有義故。說於不變下。卽將初門釋變。不變。四此二不二下。雙融不變隨緣二門。就第三釋變不變中。云何有義。說於不變。旣以二空所顯真

如。則湛然常存。體無變易。云何以空義故。說於隨緣。由依他無性。卽是空義。要在緣中方顯空理。故知隨緣四中上來且隨一義。以收二宗。以法相宗唯不變故。無相宗中唯性空故。故湏第四雙融二門。具足無碍。方順圓融法性宗意。一義旣卽。空有亦卽。隨緣卽是不變。故空性卽是有性。不變故能隨緣。則有性卽是空性。若非實有。將何隨緣而成諸法。如本無水。將何隨風而成波浪。

疏若唯不變。性何預於法。若但隨緣。豈稱真性。故隨其流處。有種種異。而其本味。停留雪山。又若性

1

1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

撰述

華嚴疏金卷三

三

三

離於法。則成斷滅。法離於性。則本無今有。又法若卽性。性常應常。性若卽法。法滅應滅。鈔若唯不變下。第二反成唯不變性。何預法者。則性如虛空。法如星象。虛空不爲星象之性。真如何得爲諸法性。則性與法異。何相干耶。若但隨緣。豈稱真性者。緣有生滅。則非真故。隨其流處下。借涅槃經以成二義。隨流有異。是隨緣義。本味停留。是不變義。卽第七經南經第八。如來性品答迦葉問。顯性是常經云。復次善男子。譬如雪山有一味藥。名曰藥味。其味極甜。在深叢下。人無能見。有人聞香。卽知其

地。當有是藥。過去世中。有轉輪王。於彼雪山。爲此藥。故在在處處。造作木筩。以接是藥。是藥熟時。從地流出。集木筩中。其味真正。王旣歿已。其後是藥。或酢或鹹。或甜或苦。或辛或淡。如是一味。隨其流處。有種種異。是藥真味。停留在山。猶如滿月。凡人薄福。雖以掘鑿。加功苦至。而不能得。復有聖王。出現於世。以福因緣。卽得是藥真正之味。善男子。如來秘藏。其味亦爾。爲諸煩惱聚林所覆。無明衆生。不能得見。一味藥者。譬如佛性。以煩惱故。出種種味。所謂地獄畜生。餓鬼天人。男女非男。非女。利利。

婆羅門毘舍首陀。佛性雄猛。難可毀壞。是故無有能殺害者。若有殺者。則斷佛性。如是佛性。終不可斷。若可斷者。無有是處。如我性者。即是如來秘密之藏。如是秘密。一切無能毀壞燒滅。雖不可壞。然不可見。若得成就。阿耨多羅三藐三菩提爾。乃證知。以是因緣。無能殺者。釋曰。以法對喻。文亦易見。然彼如來秘密佛性。以合一味。即是此中如來藏性。不變隨緣。二義分明。但雪山喻經。其過去王。喻過去佛。復有聖王。即是合中。若得菩提。餘並可知。又若性離於法下。覆成上義。上云性何預法。即是

離義。則成斷滅者。性離於法。非卽法空。故性成斷。言法離於性。本無今有者。性出自古。爲本有法。旣離性。故本無今有。有何過耶。則虛空中。本無衆生。常出衆生。若爾。法卽於性。應非本無今有。何以論云。從無之有曰生。自有還無稱滅。釋曰。緣會事顯。則是本無今有。無始衆生。不可得言。本無今有。旣涅槃云。本有今無。本無今有。三世有法。無有是處。上半約相。下半約性。旣相與性。不得相離。則本無之法。非全本無。今有之法。非全新有。是故下云。三世有法。無有是處。此偈廣義。已見初

品。又法若卽性等者。然常無常。非卽非離。此以不卽難其全卽。性若卽法者。謂水若卽波。波滅水滅。今但波滅。而水不滅。則法若滅時。而性不滅。則非全卽也。故大品中。佛問須菩提。心若生時。爲卽性不答言。卽性此心滅不。答云生法必滅。佛言真性滅不。答云不滅。佛言此處可思議。不答云不可思議。卽斯義矣。

疏故二相成。非常非斷。此二相奪。故說非有非空爲中道義。鈔故二相成下。三結歸中道。略有三重。上非卽非離爲中道。由此故成非斷非常。非有非無。亦應言非變非不變也。

疏苟得其會。不惑百家異說。願諸學者。虛已求宗。鈔苟得其會下。四結勸修學。使無偏執。上已明大意。

眼耳鼻舌身。心意諸情根。以此常流轉。而無能轉者。疏次正釋文。且第一偈答三問者。初答何因種種。此具二意。鈔先答何因下。標也。謂此一偈具四因中第二八識熏習。第三由無定性。

疏一以八識熏習而成故。初句五識。次句心是本識。集起義。故意通六七。七謂審思量故。六謂意之

識故了別義故。偈文窄故不立識言亦諸情攝此從別義通則八識皆得心意識名諸情根者通於八種類非一故五依色根六依第七七八互依又第七識爲染汙根第八又爲諸根通依云諸情根言以此者以上八識爲能所熏展轉爲因而常流轉無別我人故云無能轉者又識外無法亦爲無者鈔次句心是本識者成唯識第五云云何應知此第七八識離眼等識別有體耶述曰以小乘謂此但是第六入過去故故爲此問論云聖教正理爲定量故謂薄伽梵處處經中說心意識二種別集起名心思量名意了別名識是三別義述曰此上總解爲小乘謂未來名心過去名意現在是識種種分別然無別體今顯經證論如是三義雖通八識而隨勝顯第八名心集諸法種起諸法故第七名意緣藏識等恒審思量爲我等故餘六名識於六別境麁動間斷了別轉故釋曰謂爲一切現行所熏是集諸法種現法爲依種子爲因能生一切故云起諸法言緣藏識等者因中有漏唯緣我境因中無漏緣於第八及緣真如果上許緣一切法故論云等也言麁動者易了名麁轉易名動

不續名間。各有所緣。故得別名。論如入楞伽第九。  
伽陁中說。藏識說名心。思量性名意。能了諸境相。  
是說名爲識。此從別義下。顯通別之義。瑜伽六十二。  
亦但有別名。大同唯識已下更無別釋。通則八  
識下。通出八識皆得三名之相。說者應云。若以集  
起以解心。第八獨名心。若積集以解心。八識皆名  
心。若思量以解意。第七獨名意。若以等無間以解  
意。八識皆名意。若以了別別境以解識。前六獨名  
識。謂了差別六塵境故。若以了別以解識。八識皆  
名識。卽別識之義。唯識第一疏云。了別別境及麤  
顯境。唯前六故。對此六塵說六識故。卽斯義也。通  
別之名。居然易了。諸情根者。通於八識。皆有根義。  
已成非一。況就八中。復有二類。前五依色。後三依  
心。三依心中。復有單雙互依之異。若具說者。復有  
多少不同。故唯識第四云。諸心心所。皆有三依。一  
因緣依。謂自種子。諸有爲法。皆託此依。離自因緣  
必不生故。二增上依。謂內六處。諸心心所。皆託此  
依。離俱有根。必不轉故。三等無間依。謂緣前滅意。  
諸心心所。皆託此依。離開導根。必不起故。釋曰。根  
識同時。名俱有也。前滅識等。猶能開避導引後生。

名開導也。然此三依。言生轉起。別相云何。生約依種。辨體而生。轉約隨順。與力令轉。起約由前開路。令後得起。然其八識說。俱有依。四師不同。今用第四護法。護法廣破前義。結云。由此五識俱有所依。定有四種。謂五色根。六七八識。隨闕一種。必不轉故。同境分別染淨根本。所依別故。釋曰。同境卽五色根。根識共同緣一境故。分別是第六。分別差別故。染淨是第七。依此能起染污識等故。根本是第八。若離第八。餘不立故。論曰。聖教唯說依五根者。以不共故。又必同境近相順故。釋曰。此會違也。謂

對法第一。但言眼識依色根。會云不共者。眼根但爲眼識依。故非餘識依。餘四亦然。六七八識通餘識。依又必同境者。根必與識同緣境故。又近相順者。六七等識。卽是遠故。是故五識定有四依。論曰。第六意識。俱有所依。唯有二種。謂七八識隨闕一種。必不轉故。雖五識俱取境明了。而不定有。故非所依。聖教唯識依第七者。染淨依。故同轉識攝近相順故。釋曰。論中有三。初正明次。雖五識下。通外問。謂有問云。意識得五緣境明了。何不亦用五識爲依。故答云。不定有故。意識不得五識之時。能獨

緣故第七下會通餘教亦是對法通亦有三。初明  
是彼染淨根故。二者六七同是轉識故。三多引意  
識起染污執故名相順論第七意識俱有所依。但  
有一種謂第八識藏識若無定不轉故。如伽陀說  
阿賴耶爲依。故有末那轉依止心及意。餘轉識得  
生。阿賴耶識俱有所依。亦唯一種謂第七識彼識  
若無定不轉故。論說藏識恒與末那俱時轉故。又  
說藏識恒依染污。此卽末那。釋曰。上引伽陀卽楞  
伽經上引論節瑜伽論然上所引唯識差別不同  
故今疏五種類非一。而順諸聖教從多而說故於

五中取不共依。六取染污故各舉其一。餘義含有  
類非一中。及次疏文重明七八二識中攝。旣七爲  
染汚根。卽與前六爲染淨依八爲通依。卽與前七  
爲根本依矣。言染污根者。第四論云。此意任運恒  
緣藏識。與四根本煩惱相應。其四者何謂。我痴我  
見我慢我愛。是名四種我痴者。謂卽無明愚於我  
相迷無我理。故名我慢。我愛者。謂我貪於所執。我深生  
妄計爲我。故名我愛。是名四種我痴者。謂倨傲恃所執我令  
心高舉。故名我慢。我愛者。謂我貪於所執。我深生  
耽著。故名我愛。并表慢愛有見慢俱遮餘部師不

相應義。彼疏釋云。餘部卽薩婆多見。慢三不得俱起。故論云。此四常起擾濁內心。令外轉識恒成雜染。有情由此生死輪廻不能出離。故名煩惱。釋曰。由此四惑常俱等。故名染污根下論文中。往往皆名爲染污意。第八又諸識通依者。卽根本依也。言諸識者。不唯第七識。心所等法。皆依此故。直就第七名染污根。若爲六依。則通染淨。故名爲染淨。依以上八識等者。釋第三句。前七爲能熏。第八爲所熏。故通云。八識爲能所熏七熏八種。七是八因八含七種。八是七因。故云展轉。又依種起現。現復

熏種。故展轉無窮。然此能熏所熏。通性相宗。先依法相宗說。唯識第二廣顯其義。論云。依何等義立熏習名。問也。所熏能熏各有四義。令種生長。故名熏習。此總答也。何等名爲所熏四義。別徵。一堅住

性。若法始終一類相續。能持習氣。乃是所熏。此遮轉識。及風聲等。性不堅住。故非所熏。釋曰。轉識謂七轉識。兼含心所。若許七識能持種者。初地已破四惑。應失一切有漏種子。已轉七識成平等性。猶有有漏種者。明是八識能持。言風聲等者。此揀根塵。以間斷相顯。故偏語之。理實等字。等取根塵。及

法處所攝色等。一切皆揀至無色界。卽無色故。入滅定等。心亦無故。名不堅住論曰。二無記性。若法平等。無所違逆。能容習氣。乃是所熏。此遮善染。勢力強盛。無所容納。故非所熏。由此如來第八淨識。唯帶舊種。非新受熏。釋曰。善染如沉麝韭蒜等。故不受熏。無記如素帛。故能受熏。佛第八識。以極善故。亦非所熏。唯於因中。曾所熏故。帶彼舊種。論曰。三可熏性。若法自在。性非堅密。能受習氣。乃是所熏。此遮心所。及無爲法。依他堅密。故非所熏。釋曰。第八心王。得自在故。可是所熏。第八同時五種心。

所體非自在。故非所熏。無爲之法體。又堅密。如金石等。故非所熏。論曰。四與能熏共和合性。若與能熏同時同處。不卽不離。乃是所熏。此遮他身。利那前後無和合義。故非所熏。釋曰。他身卽上同處。無有以他身識爲我所熏故。利那前後卽上同時揀於經部前念之識。熏後念故。論曰。唯異熟識。具斯四義。可是所熏。非心所等。釋曰。此總結也。非心所者。卽第八同時心所等。取所餘。如上所揀。論曰。何等名爲能熏四義。釋曰。徵也。論曰。一有生滅。若法非常能有作用。生長習氣。乃是能熏。此遮無爲。前

後不變。無生長用。故非能熏。二有勝用。若有生滅。勢力增盛。能引習氣。乃是能熏。此遮異熟心心所等。勢力羸劣。故非能熏。釋曰。勝用有二。一能緣勝用。卽揀諸色爲相分熏。非能緣熏。二強盛勝用。謂不任運起。卽揀別類異熟心等。有緣慮用。無強盛用。爲相分熏。非能緣熏。由斯色等。有強盛用。無能緣用。異熟心等。有能緣用。無強盛用。諸不相應法。二用俱無。皆非能熏。論曰。三有增減。若有勝用。可增可減。攝植習氣。乃是能熏。此遮佛果圓滿善法。無增無減。故非能熏。彼若能熏。便非圓滿。前後佛

果。應有勝劣。釋曰。有增減者。第七末那。至無漏位。亦有增減。唯除佛果。言有勝劣者。前佛應勝。以熏無漏種子多故。論曰。四與所熏和合而轉。若與所熏同時同處。不卽不離。乃是能熏。此遮他身利那。前後無和合義。故非能熏。釋曰。此第四義。大同所熏。上二皆云共和合者。和合卽是相應異名。論曰。唯七轉識。及彼心所有勝勢用。而有增減者。具此四義。可是能熏。釋曰。上結能熏。論云。如是能熏。與所熏識。俱生俱滅。熏習義成。令所熏中種子生長。如熏芭藤。容名熏習。上來皆是法相宗意。下經數

6

1 2 3 4 5 6 7 8 9 10 1 2 3 4 5 6 7 8 9 10

撰述

華嚴疏錄卷三

三

五

數有熏習義。莫厭繁文。第二法性宗者。上法相宗所熏。第三能熏。第一正揀真如受熏之義。今法性宗亦七識等而爲能熏。八爲所熏。其第八中。以如來藏隨緣成立。含有生滅不生滅義。故熏第八。卽熏真如。故起信云。復次有四種法熏習義故。染法淨法起不斷絕。云何爲四。一者淨法。名爲真如。二者一切染因。名爲無明。三者妄心。名爲業識。四者妄境界。所爲六塵。熏習義者。如世衣服。實無於香。若人以香而熏習故。則有香氣。此亦如是。真如淨法。實無於染。但以無明而熏習故。則有染相。無明。

染法。實無淨業。但以真如而熏習故。則有淨用。云何熏習起染法不斷。所謂以依真如法故。有於無明。以有無明染法因故。卽熏習真如。以熏習故。則有妄心。以有妄心故。則熏習無明。不了真如法故。不覺念起。現妄境界。以有妄境界染法緣故。卽熏習妄心。令其念著。造種種業。受於一切身心等苦。廣如彼論。是則真如。亦爲能熏。亦能受熏。故楞伽云。不思議熏。不思議變。是現識因。謂不可熏而熏。故名不思議熏。真如不變而隨緣成立。名不思議變。亦卽不染而染也。賢首云。妄心通業識及事識。

撰述

華嚴疏鈔卷十三

三

未

今據其本。言業識耳。言熏習故有染相者。真如本無相。隨熏現相。又顯妄法無體。故但云相。此釋經中如來藏爲惡習所熏等。上卽生滅門中真如。言有淨用者。此是生滅門中本覺真如。故有熏義。真如門中則無此義。由此本覺內熏不覺。令成厭求。反流順真。故云用也。此釋經中由如來藏故。能厭生死苦。樂求涅槃也。涅槃經云。闡提之人。佛性力故。還生善根。彼言佛性力者。卽此本覺內熏之力。良以一識含此二義。更互相熏。偏生染淨。此中佛者是覺。性者是本。故名本覺。餘如彼說。無別我下。

釋第四句。然有二意。一破我執者。卽人也。二又識外下。破於法執。卽此言者通一切法。

疏二明由不相知方成種種。上半出種種。以此者以前不相知故。舉體性空。方成流轉。卽此八識。名無體性。故無實我法。而爲其主。向若有性。不可熏變。安得流轉。鈔二明不相知方成種種者。卽第二段明。前四因中第三因也。但由偈中以此二字。取義不同。故一偈文通於二義。取文全別。前熏習義。則以此二字。全指上半爲流轉因。今顯無性。卽上半偈爲流轉果。上半出種種。卽以此二字。指前

五偈法喻所明不相知義爲流轉因。卽此八識下釋第四句。旣所流無性。何有能轉者耶。其主者通於人法。向若有性下上來順釋。此下反釋。猶如金石各有堅性。不可令易。今此無性。猶如於水遇冷成冰。逢火便暖。故中論云。集若有定性。先來所不斷。於今云何斷。道若有定性。先來所不修。於今云何修等。故知若无定性。一切諸法皆悉不成。若無定性。一切皆成。故中論云。以有空義故。一切法得成。若無空義者。一切卽不成。無性卽空義也。

疏次遣疑者。以虛妄中有二義故。一虛轉。二無轉。故常種種常一性也。鈔次遣疑下釋第二番懷疑問也。由前問云。爲是一性。爲是種種。故今答云。常一常多。一虛轉者。無性故有也。二無轉者。無性故空也。虛轉故常種種。無轉故常一性。勿滯二途也。

疏次答難者。虛轉故俗不異真。而俗相立。無轉故真不異俗。而真體存。故互不相違也。鈔後答難下。卽答第三番設難也。謂前難云。一性隨於種種。則失真諦。種種隨於一性。則失俗諦。故今意明。不相違也。虛轉等者。轉故是俗。虛故不異真。旣言虛

轉則俗相立。無轉等者。無轉卽真也。以卽轉言。無故不異俗。卽轉是空。故真體存。俗法離真而無別體。故云相立。真不可見。但云體存。上句俗不違真。下句真不違俗。故疏結云。互不相違。

法性本無生。示現而有生。是中無能現。亦無所現物。疏第二偈。亦答三問。初明真如隨緣。故成種種者。答所以也。初句印上心性是一。是不變義。次句答上云何見有種種。是隨緣義。唯心變現。全攬真性。生非實生。故云示現。下二句。印上業不知心等者。以是隨緣。不失自性義故。是以諸趣種種了不可得。生卽無生。無能現者。性不動故。無所現者。妄法虛故。鈔唯心變現者。正釋真如隨緣之義。謂卽依前諸識熏習之緣。所熏真如。隨緣成法。故云全攬真成。以離如來藏。無有質體。爲能所熏。故云全攬真成。正揀法相真如之外。有能所熏。真性卽如來藏性。如來藏性卽生滅門中真如。生非實生。正釋示現字。亦仍上起。謂旣攬真生。生相卽虛。故云示現。以是隨緣者。如水遇風緣而成波浪。濕性不失。如來藏性。雖成種種。而不失於自清淨性。此中隨緣。卽是前經見有種種。此中不失自性。卽前業。

勘

1 2 3 4 5 6 7 8 9 10 1 2 3 4 5 6 7 8 9 10

不知心等。對上問中。故云諸趣種種了不可得。對今經文。故云生卽無生。生卽諸趣。無生卽不相知。躡上示生之句。經云此中。卽下八字。是不失自性。無能現者。真如隨緣成一切法。如卽能現。不失自性。名性不動。何有能現。妄攬真成。故自虛無體。疏次遣疑者。常生常無生。上半卽無生之生。業果宛然。故勝鬘云。不染而染。難可了知。下半生卽無生。真性湛然。故勝鬘云。染而不染。難可了知。又法性本無生。不空如來藏也。此中無能現。空如來藏也。鈔上半卽無生之生者。由上疑云。爲是種種。

爲是一性。故今答云。無生之生。卽常種種。生卽無生。故云一性。本末染淨。旣相交徹。安可凡情而了知耶。又法性本無生者。上約不變隨緣。今約二空。卽以能隨緣者爲不空藏。故有種種。卽上半也。隨緣不失自性。名爲空藏。以妄法不染故。卽是下半。又約二藏體。卽是一性。不碍隨緣。故有種種。不空。卽是一性。空藏。卽不相知。

疏答第三難者。此中無能現。性非性也。亦無所現。物相非相也。又示現而有生。性不違相。亦無所現。物相不違性。無二爲二。二卽無二。無碍圓融。豈有

乖耶。鈔答第三難者。謂上難云。一性隨於種種。則失真諦。種種隨於一性。則失俗諦。亦性相相違。今答意明。性相無違。然疏有二意。一明性相雙絕。故無可相違。卽下半意。又示現下。第二明性相相成。故不相違。卽是上半。卽無生之性。不違示生之相。言亦無所現物者。雖牒第四句。連取第二句。正示現生。卽無所現。故不違性。無二爲二者。結也。一體而分。能現所現。云無二而二。性相無違。爲二。卽無二。故云圓融。豈得種種乖於一心。心性乖於種種。

疏言法性者。法謂差別依正等法。性謂彼法所依體性。卽法之性。故名爲法性。又性以不變爲義。卽此可軌。亦名爲法。此則性卽法故。名爲法性。此二義並約不變釋也。又卽一切法各無性故。名爲法性。卽隨緣之性。法卽性也。鈔言法性下。隨難別釋。先解法性。後解本字。今初有三。前之二義。雖有依主持業不同。然皆與法不得相卽。以不變之性。非妄法故。第三隨緣與法不離。不卽不離。方爲真性。

疏本有二義。一約不變。本謂源本。本來不生。隨緣

故生。一約隨緣。有此法來。本不自生。非待滅無。卽示現生時。本不生故。故下云無能現也。鈔本有二義義者。釋本無生。由於法性有其不變隨緣義。故今本亦一本。卽是性。末卽是相。前不變本。與末不卽後隨緣本。與末不離。不卽不離。融無障礙。爲真本也。

眼耳鼻舌身。心意諸情根。一切空無性。妄心分別有。疏第三偈答三問者。初答所以者。上三句種種卽一心性。亦印前文殊不相知等。下句出因。由妄分別。故有種種正答前問。此復二意。一上二句。依

他起也。次句圓成實也。後句偏計性也。由偏計故能起依他。依他無性。卽圓成實。故唯識云。依他起。自性分別緣所生。圓成實於彼。常遠離前性。故此與依他非異。非不異。鈔此復二意下。上來總明。此下別釋。會性相宗。初三性釋。通於二宗疏文有三。初直屬經文。是法性意。依他無性。爲圓成故。由偏計下。二正釋偈意。由妄分別。有上眼等。旣從緣生。故體卽空。空卽圓成故。唯識下三引文證成。二宗三性。已見玄文。今此略引。依圓二性初之二句。是依他性。故彼釋云。妄分別緣。卽是偏計。然妄分

別是能徧計。眼等依他是所徧計。計爲實故成徧計性。由此能生染分依他。故此徧計能起依他。是彼他故圓成實下釋圓成性一偈分二上半正釋。下半明與依他起性非一異義。彼論釋云謂圓滿成就諸法實性顯此常徧體非虛謬。據自共相虛空我等此卽於彼依他起上常遠離前徧計所執。二空所顯真如爲性說於彼言顯圓成實與依他起不卽不離常遠離言顯妄所執能所取性理恒非有。前言謂顯不空依他性顯二空非圓成實。眞如離有離無義故釋曰玄文已釋但釋論意分前

性字二義不同遠離前言已空徧計故是離有而言性者自屬真如故能離無是以結云真如離有離無相故若依此釋則空無性妄分別有皆是徧計前偈法性方是圓成今順法性依他無性即是圓成故一偈中三性具足設順彼宗離有離無遠離前性離徧計有又次偈云此諸法勝義亦即是真如常如其性故卽唯識實性此則離無未失彼宗何湏傷巧離前性字若會二宗依他起上無徧計性卽是圓成此無性理是真如故已離有無故八地云無性爲性故此與依他下釋非一異謂由

圓成於依他起。遠前性故成非一異。故云故此。彼論釋云。由前理故。此圓成實與彼依他非異不異。異應真如。非彼所依。不異此性應是無常。彼此俱應淨。非淨境則本後智。用應無別。釋曰。圓成唯淨。智境依他通淨非淨。豈得全同。

疏二者上二句因緣所生法也。次句我說卽是空也。後句亦謂是假名。此二不二是中道義。鈔二者上二句下別會法性宗三觀。欲顯包含。取文小異。中論偈云。因緣所生法。我說卽是空。亦謂是假名。亦是中道義。配經可知。然中道言經文所無。但舍下半空有爲中。若取別顯。亦在前偈法性無生。卽前偈中亦具三觀。初句中道。次句假名。下半卽空。由前已配真如隨緣。故不顯耳。又真如隨緣。亦不殊三觀。上別出二宗。取文小異。若以義會。二宗無違。因緣所生法。卽總舉三性所依之法。我說卽是空。偏計性也。亦謂是假名。依他起也。亦是中道義。圓成實也。但三性迢然。卽法相宗今皆言卽是法性宗。但卽不卽。小有不同。便成天隔。然法相宗亦非卽離。多成不卽。法性宗中亦非卽離。多成非異。法相由不卽空。偏計是空。但是空無法性。則明

1 2 3 4 5 6 7 8 9 10 1 2 3 4 5 6 7 8 9 10

由無徧計。令依他空。便成天隔。後人隨計。二互相乖。虛已而求。大旨無別。顯經包攝。備舉二文。又經旨無差。二宗隨取。

疏又妄心分別有者。情計謂有。然有卽不有。故云一切空無性。常有常空。是卽萬物之自虛。豈待宰割以求通哉。鈔又妄心下。二答懷疑問。謂上問言爲是一性。爲是種種。故今答云。常空故常一性。常有故常種種也。是卽萬物下。肇公不真空論意也。意云。萬物自虛。卽常一常多矣。故彼論云。尋夫不有不無者。豈曰滌除萬物。杜塞視聽。寂寥虛豁。

然後爲真諦者乎。誠以卽物順通。故物莫之逆。卽僞而真。故性莫之易。性莫之易。故雖無而有。物莫之逆。故雖有而無。雖有而無。所謂非有。雖無而有。所謂非無。如此則非無物也。物非真也。物非真故於何而物。故經云。色性自空。非色敗空。以明聖人之於物也。卽萬物之自虛。豈待宰割以求通哉。釋曰。此明體法卽空。非析法明空也。

疏又前偈從本起末。末不異本。此偈攝末歸本。本不碍末。豈相乖耶。鈔又前偈下。釋第三重結成難。謂前偈法性爲本。示生爲末。此偈以空無性爲

本眼等爲末攝。末歸本種種不乖一性。非本無末一性。豈乖種種欲顯起。末攝末逆順具足。故引前偈。非獨此偈不能答難。若獨此偈答者。謂眼耳等卽無性。故種種不乖一性。無性要依眼等。故一性不乖種種。又從本起末。卽不動真際。建立諸法。攝末歸本。卽不壞假名。而說實相。義理無妨。

如理而觀察。一切皆無性。法眼不思議。此見非顛倒。

疏第二一偈。釋成前義。然有二義。一者云何得知無性。以法眼觀。稱性非倒。成淨緣起。當知此理甚爲決定。二者前偈訶其見有種種。是妄分別。此不應依。此偈印前觀察無性。各不相知。斯爲法眼。固應依止。卽依智不依識也。

若實若不實。若妄若非妄。世間出世間。但有假言說。疏第三一偈。拂迹入玄者。謂前法性無生。一切皆空。實也。示現有生。眼等差別。非實也。妄心分別有妄也。如理觀察。非妄也。以妄爲緣。生世間流轉。以如理觀。成出世間。非倒法眼。皆是名言。而無眞實。何者。如言取故。鈔第三一偈。拂跡入玄。先正釋偈文。然實不實。約事理說。妄非妄者。約情智說。上卽如如及相。下卽妄想正智。並屬於名。五法具矣。

而其疏文雙牒前二偈文細尋可知。初畧標亦約智說故曉公云。如言而取所說皆非。得意而談所說皆是。十地論云。如言取義有五過失。若不取著實非實等。並皆契理。故中論云。一切法真實。一切法非實。亦實亦非實。非實非非實。是名諸佛法。則真妄等。一一例然無非當也。

疏又欲言其實。而復示生。欲言不實。體性卽空。欲言是妄。妄不可得。欲言非妄。能令流轉。欲言世間。卽涅槃相。欲言出世。無世可出。則染淨兩亡。是以物不卽名以就實。名不卽物而履真。然則實理獨

靜於言教之外。豈文言之能辨哉。故但假說。是以什公云。唯忘言者可與道合。虛懷者可與理通。冥心者可與真一。遺智者可與聖同耳。鈔又欲言其實下。二別釋。亦約理釋。以理圓言偏。言不及故。以實非實等。相卽相奪。一一圓融。理致包含。故是以物下。三結成於中二。初正結。卽肇公不真空論意也。然此言因破汰公本無論後結成言也。彼論具云。本無者。情尚於無。多觸言而賓無。故非有有。卽無也。非無無卽無也。尋夫立言之本旨。直以非有非真。有非無非真無。何必非有無此有。非無無

彼無。此直好無之談。豈謂順通事實。卽物之情哉。夫以物物於物。則所物而可物。以物物非物。故雖物而非物。是以物不卽名以就實。名不卽物而履真。然則真諦獨靜於教名之外。豈文言之能辨哉。今但引其結文兩對耳。言物不卽名以就實者。物體虛無。無當名之實也。名不卽物而履真者。名但假立。無得物之功也。若名卽物。召火卽應燒口。若物卽名。見物卽應知名。今不爾者。明俱非實。故不相得也。是以什公下。第二引證卽悟玄序。其前文云。夫玄道不可以設功。得聖智不可以有心知。真諦不可以存我會。至功不可以營事爲。今疏卽次下之言。此上二對。反顯難思。疏文所引。卽順明難思。忘言者。捨筌蹄也。虛懷者。離取著也。冥心者。不已見也。遺智者。泯能證也。道理真聖大同小異。然上三卽法後一約人道者。虛通。卽前玄道理。揀於事。卽前至功所契。真揀於俗。卽前真諦。聖揀於凡。卽前聖智。故有心不契。遺智方知。若有契合。復應拂跡。故彼次云。雖云道合。無心於合。合者合焉。雖云聖同。不求於同。同者同焉。無心於合。卽無合無散。不求於同。卽無同無異。超非於百非之外。非所

不能非焉。忘是於萬是之內。是所不能是焉。非所不能非。則無非矣。是所不能是。則無是矣。無異無同。故怨親無二。無是無非。則毀譽常一。夫然。則幾於道矣。今略引二對。足令得意。

△疏又後三偈。亦如次明三無性觀。鈔又後三偈。下第二攝疊重釋上之十偈。從後漸收。於中有二先收中自有三重。第一收後三偈爲三無性觀者。唯識論云。卽依此三性。立彼三無性。初則相無性。次無自然性。後由遠離前所執我法性。釋曰。謂依偏計所執性。說相無自性。性由彼體相畢竟非有。

如虛空花。繩上蛇故。故今偈云。一切空無性。妄心分別有次。依依他起性。立生無自性。此如幻事。託衆緣生。無始妄執自然性。故今偈云。如理而觀察。一切皆無性。後依圓成實性。立勝義無自性。性謂卽勝義。由遠離前偏計所執我法性故。故今偈云。若實若非實。若妄若非妄。皆是假說。實卽圓成。非妄卽契圓成之智。成於出世。並是假名。實尚不實。何況非實。舉況總結。故云非實。妄及世間。一時總遣。

疏又此五偈合前四喻。初以流轉。合水漂流。次頌

合火。火本無生。隨緣生故。次頌合風。風卽空無。因見物動。妄謂有故。次頌合地。法眼見理。無分別故。後一總顯。令亡言故。鈔又此五偈下。二合前四喻。由依此義。十偈正答。亦可分四。初諸諸法無體性。一偈。法說宗因。次四偈舉四同喻。三有四偈。別合前喻。四者末偈。結成前義。則五分具矣。

疏又前五偈。是印成答。次四出所以答。後一奪令亡言。

疏文殊一問以含多意。覺首縱答。體勢無方。逆順研窮。以顯深致。幸諸學者。不咎文繁。鈔文殊一爾時文殊師利菩薩問財首菩薩言。

疏第二教化甚深。先問中二。初標告。告財首者。彼得此法財益。生門故。

佛子。一切衆生非衆生。

疏二正問中二。初立宗。衆生卽非衆生。彼此同許。亦可躡前覺。首八識皆空。云何如來隨其時。隨其命。隨其身。隨其行。隨其解。隨其言論。隨其心樂。隨其方便。隨其思惟。隨其觀察。

撰述

華嚴疏鈔卷三

三

卷三

疏二云何下設難爲衆生旣空佛云何化若佛不見生空則無大智便成謗佛若見空而化豈不違空空有相違進退何據於中先明十隨辨所化差別後明三輪顯能化不同今初一隨根生熟時如是時中堪如是化又此句爲總謂隨何壽命時等下九爲別各有二義謂隨其壽命修短而化又以無命者法而教化之身二義者謂隨其所受何等類身而受化故又宜以觀身空寂等而得度者以彼化故餘準此知故下答中多說後意行謂三業善惡解謂識解差別言論者國俗教誨此六多約

未發心前鈔餘準此知者上三各顯二義下七不欲繁文故令例知若具說者行二義者一隨修行時二以何行化之其能化行與所行行未必全同如行施行時或以施行化或以禪慧行化故解二義者一隨有深淺之解二說諸佛菩薩之解化故言論二者一隨何國俗言說二宜用何等言辭化故

疏後四多約發趣已去心樂者有所欣求方便者隨所進趣思惟者依法求義觀察者如說修學鈔心樂二者一隨希求何法二稱根爲說諸業故

撰述

方便二者。一隨何進趣時。二隨用何善巧等化故。  
思惟二者。一隨思求何義。二說云何思化故。觀察  
二者。一如修學時。二稱宜爲說觀察相故。

於如是諸衆生中。爲現其身。教化調伏。

疏二於如是下。能化差別。先牒十隨後現三業。教  
化調伏。通於語意。爲以十隨化故。衆生非空耶。爲  
以衆生空故。十隨虛設耶。

時財首菩薩以頌答曰

疏第二財首答中。準諸深經。及此偈文畧有四意。  
一佛見衆生本來自空。非斷空故。不碍隨化。偈云。

諸法空無我。衆報隨業生。故二佛知衆生不能自  
知。真空故。悲以隨化。偈云。隨解取衆相。顛倒不如  
實故。三隨化卽空。不異衆生空故。二不相乖。偈云。  
寂滅多聞之境故。四融土諸義良以攬空爲衆生  
生與非生。唯一味故。不增不減。經云。卽此法身流  
轉五道。名曰衆生法身。卽衆生。衆生卽法身。法身  
是法身。不湏更化。大智現前。見於法身隨緣卽衆  
生。故大悲攝化。今以寂滅非無之衆生。恒不異真  
而成立故。是不動真際。無化而化。以隨緣非有之

法身恒不異事而顯現故不壞假名化卽無化所  
化旣空有不二能化亦悲智不殊鈔一佛見下  
初一空不碍化答二佛知下智不碍悲答三隨化  
下化不違空答四融上等者卽總攝上三共爲一  
致也然前三中初後卽性相交徹中一乃悲智雙  
運故今融成悲智性相皆無障礙就文更三初明  
所化性相無碍卽前第一意以斯義下二躡前初  
意以辨能化卽前第二意悲智無碍悲對前事智  
對前理今以寂滅下三更融前能所兼具前第三  
意方成一味初融所化性相無礙以成能化無化

而化卽前第一意以隨緣下二融其能化成前第  
三化不失空所化旣空下對於所化成前第二能  
化悲智無碍之義

疏不得有而觀空方能入理不動真而隨化方能  
究竟化他衆生不知此理故流轉無窮今令衆生  
悟如斯法是則真實隨化非直十隨不違空理亦  
由此十方契真空故淨名云當爲衆生說如斯法  
是卽真實慈也鈔不得有而觀空下第二結釋  
於中有五一旣云不得有而觀空方能入理結成  
問意則前以空難隨化非得意也二旣云不動真

而隨化結成答意。三衆生下結成化意。四非直下正結無違。非但無違。兼能相成。五故淨名下引證。但證爲衆生說如斯法。卽觀衆生品。維摩詰問文殊師利云。云何觀於衆生。文殊答言。我觀衆生。如第五大。如第六陰。如第七情。如十三入等。意明畢竟空故。次淨名問云。若爾。云何行慈。答曰。當爲衆生說如斯法。是卽名爲眞實慈也。然上云寂滅。非無之衆生者。體雖寂滅。不無衆生之相。由寂滅故。恒不異真。由非無故。而恒成立。是故不動真際等者。卽智論意謂。不動真際而建立諸法。不壞假名。

而說實相

此是樂寂滅多聞者境界。我爲仁宣說。仁今應聽受。疏十頌分二。初一舉法勸聽。上半以人顯法。已含答意。上句體深。下句用廣。卽聞之寂。則聞無所聞。故無衆生。大經亦云。若知如來常不說法。是名具足多聞。卽寂多聞。則善解藥病。不得隨化。下二句許說勸聽。鈔大經亦云。下卽二十六經教體中已辨。

分別觀內身。此中誰是我。若能如是解。彼達我有無。疏分別後九頌。別答前問。文勢多含畧。爲二釋。一

者。一一別答。謂初二答隨身。次一隨命。三二頌答隨觀察。四一頌答隨行及方便。五一頌答隨心樂及解。六一頌答隨言論。七一頌答隨思惟時通此九。二謂依前五隨答後四隨亦時通於九。今依此消文。文分爲六。初三頌教依隨何身時。隨其心樂修其方便。思惟觀察。此四徧於五段。二有一頌依命時。三二頌依行時。四一頌依解時。五一頌依言論時。六一頌教離二取。通結上文。今初三頌。若著我時。作界分別觀。分別觀身。皆無我故。若愛染身時。作念處觀。觀於內身及心法故。總相而言。即二中求我不得故。

空觀。初一我空。次一法空。後一類通一切。鈔總相而言者。謂界分別。及四念處。皆明二空。故便以二空科判經文。我空下。卽界分別觀。謂十八界等中求我不得故。

疏今初上半。卽尋思觀。觀於內身四大五蘊。若卽若離。尋求王者。不可得故。下半觀益。如實知於假我。則有計實我無。鈔上半尋思觀者。斯爲方便。卽顯下半。是如實觀。

此身假安立。住處無方所。諦了是身者。於中無所著。疏次偈觀身實相。法無我觀。上半諦了身空。謂攬

緣假立來無所從。故本無住處。緣盡謝滅去。無所至。無停積處。虛假似立實無所住。下半觀益。鈔謂攬緣假立者。此釋初句。來無所從下。釋次句。虛假似立下。雙結二句。

於身善觀察。一切皆明見。知法皆虛妄。不起心分別。疏後偈類通。以身觀身。既明見自身。二我皆空。則知萬法皆是虛妄。此觀亦寂。故不起心。鈔以身觀身者。卽借老子之言。彼云。以身觀身。以家觀家。以國觀國。以天下觀天下。此觀亦寂者。此釋不起心分別言。此句有二意。一旣物我皆虛。故不分別。

物我皆異。此意則淺。故略不出。今明知空之心。卽是此觀。二我旣寂。觀何由生。若觀不亡。非見空矣。則空病亦空。能所雙寂矣。

疏若作念處釋者。內身據於外器。及他身故。念處有二。一通二別。通則身等皆無我等。別則觀法無我。今は通也。復有二種。一小二大。此中是大。觀身性相同。虛空故。空無二我。誰是我言。已兼二我。次偈觀受。不在內外中間。故無方所。後偈觀心及法。不得善法。及不善法。故云知法虛妄。心如幻。故不起分別。鈔內身下。然四地中。有於三身。智論瑜

伽各有解釋。今卽瑜伽意。以自身爲內身。二。以外器瓶衣車乘等爲外身。三。以外有情妻子男女等爲內外身故。今揀於後。二念處有二下。釋此中誰是我句。謂有問言。準念處觀。觀身不淨。觀受是苦。觀心無常。觀法無我。今何觀身爲無我耶。故今答云。有通有別。上以別難。今約通說。故於觀身得作無我及苦。無常不淨之觀。今但舉無我耳。復有二種下。通釋一偈。亦爲通妨。謂有問言。下既別觀受及心法。法應無我。何無不淨苦等觀耶。故今答云。約大說故。然大乘中。具有二觀。謂約世諦。則觀

身等爲不淨等。約第一義。則觀身等同虛空等。今約大小對辨。則不淨等。唯屬小乘。觀身性相同。虛空等。唯屬於大。誰是我下。上約界分別觀。釋誰是我。但遣人空。次第二偈。方遣法我。今約大乘念處。故兼二我。謂於四大五蘊。求其主宰。了不可得。但蘊等合。則人無我。觀蘊等相緣成故空。則法無我。疏又別則身受不同。通則受等皆身。是故三偈皆致身言。鈔又別則身受不同下。此亦通妨。謂有問言。大小二觀。皆觀身受心法。今何三偈。皆有身言。故此通以身受心法。但合五蘊。五蘊皆身。亦猶

淨名方便品云。是身如聚沫。不可撮摩。是身如泡。不得久立。是身如燄。從渴愛生。是身如芭蕉。中無有堅。是身如幻。從顛倒起。此則如次喻於五蘊。皆名爲身。若別說者。應言色如聚沫。受如水上泡。想如熱時燄。諸行如芭蕉。諸識猶如幻。今皆言身。明知四處皆得稱身。故云通則受等皆身。

疏前問意云。衆生旣空。云何如來隨其身化。今釋意云。以彼不知身本空寂。教如是觀。故說如來隨衆生身而教化也。下皆準之。

壽命因誰起。復因誰退滅。猶如旋火輪。初後不可知。

疏二頌。令於壽命思惟觀察。命謂命根。能令色心連持。故名爲命。壽謂壽限。卽命根體實。謂由業種力。引一期報。衆同分體。住時分限。假立壽命。

鈔命謂下。先釋壽命二字。先依小乘。卽俱舍根品偈云。命根體卽壽。能持暖及識。論引對法云。云何命根。謂三界壽。謂有別法。能持暖識。說名命根。此有三法。壽謂能持。故名爲體。疏云。色心色即是暖。暖必依色。實謂由下。約大乘釋。卽唯識第一廣破小乘離色心外。別有命根竟。示正義云。然依親生此識種子。由業所引功能差別。住時決定假立命

根而疏云引衆同分體者通大小乘大乘是假小乘有實故俱舍云依同分及命令心等相續又云同分有情等同謂身形等同互相似故分者因義謂由此分能令有情身形等同言有情者同分所依據非情也等者據於不等正顯能依同分義也論云別有實物名爲同分彼言衆同分者衆多同分故唯識廣破竟示正義云然依有情身心相似分位差別假立同分卽大乘義具如疏文

疏從業緣起起卽無起業盡便滅滅無所滅本無主者況利那生滅實無自性鈔從業緣別下二

通顯上半先以因緣門釋後況利那下以生滅門釋

疏喻以火輪謂旋火速轉不見始終生滅遙流寧知本際又薪火不續識鉢謂輪命實遷流妄謂相續又輪資火有命假心明待他而成固無自體鈔喻以火輪下釋偈下半疏有三意初二皆喻上生滅門而初就所知二就能知第三意喻上因緣門然上法說因果對明今合喻中能所對說命爲能依心爲所依依心假立故是因緣故生公云如杖薪之火旋之成輪輪必資火而成照有情亦如

之必資心而成用也。以彼情依於心。類此命依於心。

智者能觀察。一切有無常。諸法空無我。永離一切相。疏三二偈。令依行時思惟觀察。成四種觀。一無常觀。二空觀。三無我觀。四無相觀。於中初偈略標其四。一切有者。三有也。亦一切有爲。然無常等。經論異說。今且依辨中邊論。以三性釋之初約徧計。名無性無常。以性常無故。約依他起。名生滅無常。有起盡故。約圓成實。名垢淨無常。位轉變故。空亦有三。一無性空。性非有故。二異性空。與妄所執自性異故。三自性空。二空所顯爲自性故。無我亦三。一無相無我。我相無故。二異相無我。與妄所執我相異故。三自相無我。無我所顯爲自相故。無相亦三。一相都無故。二相無實故。三無妄相故。鈔然無常者。淨名諸經皆說。下第三住當廣示之。今依中邊。蓋是一義。卽第二論。彼論具有無常苦空無我論。云無常三者。一無性無常。謂徧計所執。此常無故。二生滅無常。謂依他起。有起盡故。三垢淨無常。謂圓成實。位轉變故。苦三種者。一所取苦。謂徧計所執。是補特伽羅。我執所取故。一事相苦。謂依他

起三苦相故。三和合苦。謂圓成實。苦相合故。空有三者。一無性空。謂偏計所執。此無理趣。可說爲有。由此非有。說爲空故。二異性空。謂依他起。以妄所執。不如實有。非一切種性全無故。三自性空。謂圓成實。二空所顯。爲自性故。無我三者。一無相無我。謂偏計所執。此相本無。故名無相。卽此無相。說爲無我。二異相無我。謂依他起。此相雖有。而不如彼偏計所執。故名異相。卽此異相。說爲無我。三自相無我。謂圓成實。無我所顯。以爲自相。卽此自相。說爲無我。彼論結云。如是所說無常苦空無我四種。

如其次第。依根本真實。各分三種。釋曰。根本真實者。上論云。謂三自性。所以名真實者。偈云。許於三自性。唯一常非有。一有而非真。一有無真實。釋曰。彼論具釋。如其次第。一常非有。即是偏計。一有非真。卽是依他。一有無真實。即是圓成。釋此句云。唯圓成實。亦有非有。唯有非有。於此性中。許爲真實。釋曰。論意云。具有具無。有此非有。故爲真實。其無字屬上。非是無真實也。意明二性。皆依於此真實上立。今經無苦而有無相。疏依三無我。開三無相。故彼論釋。無我之中。皆有無相。又亦依此三種無

相。對於三苦。以論對疏。廣略可知。

疏然皆融攝。則此宗意。而偈正意。多約前二性辨。衆報隨業生。如夢不真實。念念常滅壞。如前後亦爾。疏後一偈。略顯二觀。上半明空觀。報從業生。如夢從思起。不實故空。下半明無常觀。由上不實。故念念無常。前卽過去。已滅事顯。例後現未。當滅不殊。世間所見法。但以心爲主。隨解取衆相。顛倒不如實。疏四一偈。依解令人唯識量觀。境卽心變。故心爲主。然此唯識略有二分。一相二見。今隨其見分之解。取其相分之相。心外取故爲顛倒也。鈔然此

唯識者。以唯識第二四師不同。謂安惠唯立一自證分。難陀立二謂相見二分。陳那立三加自證分。護法立四。於前三上加證自證分。依彼論宗。卽以四分而爲正義。故今疏云。略有二分。以諸經論及彼論文。多說二故。謂離二取等。而論文有三。初明立二。二明立三。三明立四。而安惠一分。於二分中破之傍出。初立二分。論云。然有漏識。自體生時。皆似所緣。能緣相現。彼相應法。應知亦爾。似所緣相說名相分。似能緣相說名見分。釋曰。謂依他二分似徧計所執二分。又以小乘相分名行相。能取所

0 1 2 3 4 5 6 7 8 9 10 11 12 13 14 15 16 17 18 19 20

緣故見分名事。是心心所自體相故。今似心外之境。名似所緣。是心外法。此中無故。所變相分。爲所緣耳。若明相分。未是顛倒。向心外取。方爲倒耳。又言見者。是能緣境義。通心心所。非推求義。推求義者。唯慧能故。次破安惠。唯立自證分。論云。若心心所無所緣相。應不能緣自所緣境。釋曰。謂緣色之心。應不能緣色。論云。或應一一能緣一切。釋曰。謂隨一識等。能緣一切境。以眼識無所緣。而能緣於色。餘識無色緣。亦應能緣色。旣餘不能緣一切。明知無所緣者。是義不然。此中正義緣自境時。心上

必有帶境之相。如境上面似面相生。次破無能緣論云。若心心所無能緣相。應不能緣。如虛空等。釋曰。同於虛空。不能緣故。論云。或虛空等。亦是能緣。釋曰。此反難也。謂心心所法無能緣。而能緣所緣。此虛空等無能緣。亦應緣所緣。論云。故心心所必有二相。如契經說。一切唯有覺所覺義皆無能覺所覺分。各自然而轉。釋曰。此卽厚嚴經。上半明無外境。下半明有見相二分。各各自從因緣所生。名所變相分。是所緣。見分名自行相。相見所依自體。自然而轉。下結正義。論云。達無離識所緣境者。則

名事。卽自證分。釋曰。此中雖是立二分家。義已有三。故次論云。若無此者。應不自憶心心所法。如不曾更境。必不能憶故。釋曰。此明有自證分。意云。相離於見。無別自體。但二功能。故應別有。一所依體。若無自證。應不自憶心心所法。如不曾更境。必不能憶。謂如見分。不更相分之境。則不能憶。要曾更之。方能憶之。若無自證。已滅心所。則不能憶。以曾不爲自證緣故。則如見分。不曾更境。今能憶之。明先有自證。已曾緣故。如於見分憶曾更境故。次下立三分。論云。然心心所。一生時。以理推徵。各有

三分。所量能量。量果別故。相見必有所依體。故釋曰。所量是相分。能量是見分。量果是自證分。自證分與相見爲所依故。如集量論伽陀中說。似境相所量。一能取相。二自證。三卽能量及果。此三體無別。釋曰。所量如絹。能量如尺。量果如解數智。果是何義。成滿因義。言無別體者。同一識故。則離心無境。次立四分。論云。又心心所。若細分別。應有四分。三分如前。第四證自證分。若無此者。誰證第三。心分既同。應皆證故。釋曰。見分是心分。湏有自證分。自證是心分。應有第四證。論云。又自證分。應無有

果諸能量者。皆有果故。釋曰。見分是能量。湏有自證果。自證量見分。湏有第四果。恐彼救云。却用見分爲第三果。故次論云。不應見分是第三果。見分或時非量攝故。由此見分不證第三。證自體者。必現量故。釋曰。意明見分通於三量。三量者。謂現量比量非量。卽明見緣相時。或量非量。不可非量法爲現量果。或見緣相。是於比量及緣自證。復是現量。故自證是心體。得與比量非量而爲果。見分非心體。不得與自證而爲其量果。故不得見分證於第二。證自體者。必現量故。第三。四分。既是現量故。

得相證。無無窮失。意云。若以見分爲能量。但用三分。亦得足矣。若以見分爲所量。必湏第四爲其量果。若通作喻者。絹如所量。尺如能量。智爲量果。卽自證分。若尺爲所使。智爲能使。何物用智。即是於人。如證自證分。人能用智。智能使人。故能更證。亦如明鏡。鏡像爲相。鏡明爲見。鏡面如自證。鏡背如證自證。面依於背。背復依面。故得互證。亦可以銅爲證自證。鏡依於銅。銅依於鏡。此上四分。卽護法之後。方有此義。論如是四分。或攝爲三。第四攝入自證分故。果體一故。論或攝爲二。後三俱是能緣。

性故攝論爲二。亦攝入見故。論或攝爲一體無別故。如入楞伽伽陀中說。由自心執著。心似外境轉。彼所見非有。是故說唯心。如是處處說唯一心。此一心言。亦攝心所。故識行相。卽是了別。卽是識之見分。釋曰。此上論文。釋偈了字。雖開合不同。今但略舉相見二分。故彼論初便立二分。處處多說。相及見故。若了相分。唯心所變。此非顛倒。謂相爲外。心外取故。是名顛倒。故上釋云。依他二分。似於徧計相見二分。今約徧計。故成顛倒。上之四分。似文則是橫法。相之要。故畧引耳。

世間所言論。一切是分別。未曾有一法。得入於法性。疏五一偈。依言論時。令尋思名等。入如實觀。謂了名等。唯意言分別。無別名等。意卽意識分別。言卽名言。名言既唯意之分別。名下之義。亦無別體。故所言論。以兼名義。鈔令尋思名等者。此借唯識。加行位中四尋思觀。四如實觀。以解經文。四尋思者。一名。二義。三自性。四差別。今云名等。等取下三。謂了名等下。卽以意言釋尋思觀。於中有三。今初總釋。意卽意識下。卽引攝論第七釋意之相論云。意謂意識。覺觀思惟。但緣名言分別。無別有義可

緣。又必依名分別諸法。故云意言分別。三名言下。會論釋經。顯四尋思相。名詮自性。句詮差別。名句皆名。自性差別皆義。故但云名義。

疏既隨分別。則妄計意流。尚未了唯心。安入法性。鈔既隨分別下。二釋下半未曾有一法得入於法性。此句牒上攝論。及經一切是分別言。故云既隨分別。妄計意流者。卽引楞伽釋成。彼經第三。因說破外道所有。皆是世論。末後婆羅門問言。痴愛業因。故有三有耶。爲無因耶。我時報言。此二亦是世論。彼復問言。一切法皆入自相共相耶。我復

報言。此二亦是世論。婆羅門乃至意流。妄計外塵。皆是世論。故云妄計意流。尚未了唯心者。上躡前分別之義。爲不入法性之由。此下舉況釋不入義。然其要觀略有二種。一唯心識觀。二真如實觀。唯心觀淺。尚未能了。真如觀妙。彼安能入法性。卽是真如異名。

疏若能如是自覺通達。是入唯識之方便也。卽復此心無相可得。妄想不生。便入法性。鈔若能如是下。上來順釋經文。不入之義。今此反顯能入之義。卽如實觀。於中先入唯心識觀。言自覺者。對上

楞伽楞伽云彼婆羅門又問頗有非世論不佛答云有外道不能知以於外性不實妄相虛僞計着故謂妄想不生覺了有無自心現量妄想不生不受外塵妄想永息是名非世論此是我法非汝有也今言自覺畧其大意令覺自心耳其通達之言卽攝論意通達唯是意言分別無有實法卽爲入唯識方便不取外相卽入唯心卽復此心下引起信論成真如實觀故彼論云心若馳散卽當攝來令住正念其正念者當知唯心無外境界釋曰此卽唯心識觀次云卽復此心亦無自相念念不可

得釋曰此卽真如實觀妄想不生亦楞伽經已如前引便入法性結成上義

疏上約心乖體非不卽又不入者妄想體虛無可入故鈔上約心乖等者通難重釋謂有難言如淨名等一切皆如文字性離卽是解脱下經亦云一切法皆如諸佛境亦然三毒四倒皆亦清淨如何言說不入法性今通有二一約修人心不入理非約法體不卽法性二約所觀亦無可入故下文云如來深境界其量等虛空一切衆生入而實無所入

能緣所緣力種種法出生速滅不暫停念念悉如是  
疏六一偈通結亦近結次前二偈能緣所緣卽見  
相也。又觀一切法唯是意言未能除遣此境亦爲  
能所也。以此爲方便得入唯心種種法出生者此  
相見二分由無始數習有種種法相似生謂能緣  
心生則種種境生所緣境起則種種心起起法必  
滅安得躩停。鈔六有一偈通結五段令離能所  
亦可近結前二偈者能所相顯初明前偈又觀一  
切下明結後偈以意言觀縱成如實亦有能所云  
未除遣加行偈云現前立少物謂是唯識性以有

所得故非實住唯識故但爲方便得通達位方入  
唯心此相見二分等者卽唯識意而言似者顯其  
無眞但似二相若執有實便成偏計起法必滅下  
釋下半然躡上半起上旣心境相藉則皆從緣生  
生法必滅一向絕故刹那不住故云安得躩停。  
疏若了相無相生無有生名了種種則了唯心若  
了無性心境兩亡則住無分別自覺智境不動法  
界名入法性鈔若了相下正顯偈意上順釋偈  
文明二取之失今令了之則令離二取是經之意  
是則反釋經文而順經意則了唯心成唯心識觀

若了無性下成真如實觀心境兩亡則住無分別  
如上所引通達位偈云若時於所緣智都無所得  
爾時住唯識離二取相故自覺智境卽楞伽意不  
動法界卽大般若意文殊室利分云繫緣法界一  
念法界不動法界知真法界不應動搖謂若言我  
入法界已動法界能所兩亡入相斯寂故不動法  
界是入法性

疏故末後偈結上諸觀令亡觀相也鈔故末後  
下總出此偈意通明結前

疏佛如是化應如是知幻人化幻皆無化化也

鈔佛如是化下總顯答意

葉祺胤自捨刻此一品



大方廣佛華嚴經疏鈔卷十三之三

60 1 2 3 4 5 6 7 8 9 10 1 2 3 4 5 6 7 8 9 10 1 2 3 4 5 6 7 8 9 10

撰述

華嚴疏金卷二

西

和

華嚴疏金卷二

二

60

1 2 3 4 5 6 7 8 9

70

1 2 3 4 5 6 7 8 9

80

1 2 3 4 5 6 7 8 9

エノ十九  
十八

十九